



清江縣志卷之十九

藝文一

言之無文其行不遠志家所錄又匪特耀聲采致
誦覽而已凡山川風物營建廢興各賢遺蹟志所
莫暇詳者藉以補苴佚漏故未可略也鄧志因取
有關於清江之地之人之事者而錄之視秦志增
其七八然一題而作者十數人一人而登者十數
作未免傷於繁富茲特刪其重複補其遺佚首紀
聖製以彰訓行不入時流用避標榜庶少合體裁歟撰藝

文志

高宗純皇帝聖製賜漕運總督楊錫綬詩

乾隆二十七年



轉漕由來大政關得人久任謂卿閑四星儲蓄天容與千里
北南歲往還革弊深應體民隱董媪兼欲恤丁艱奉公盡職
誠斯在扈蹕儀文儘可刪

聖製賜漕運總督楊錫紱詩 乾隆三十年

內供卿貳外封疆司運今番政最良不必精嚴事皆就善於
驅使衆胥襄卽今水次排南舸弗悞秋來到北倉更議僉丁
蠲積習不徇流俗審應臧

聖製諭祭原任漕運總督楊錫紱文 乾隆三十四年

皇帝諭祭於原任漕運總督楊錫紱之靈曰制函承寵爰資
舟楫之功彛典酬庸聿煥絲綸之色惟令問堪垂於簡冊斯
隆恩下逮於几筵爾楊錫紱宣力夙聞奉公罔懈早備鶴廳

之選更聯豹直之班敷歷中外者有年用佐禮刑而無忝洎
領柏臺之總奕奕峩冠迨持藻鑒之平兢兢聽履惟漕節寄
輓輸之任俾廷臣綜轉運之司清操可風簡稽弗爽成勞具
在溘逝忽聞考舊典以彰勤賁餘榮而致奠嗚呼杼枕挽粟
難忘掌庾之勛頒惠加籩式著飛芻之績靈而不昧庶克歆
承

聖製原任漕運總督楊錫紱碑文 乾隆三十四年

朕惟服勞資篤棊飾終之典宜隆示後永休聞壹惠之文特
重惟成績可垂於璇璣斯榮各式煥以絲綸爾原任漕運總
督楊錫紱敷歷有年奉公匪懈分香雞舌早登司列之班簪
筆螭頭夙著光朝之譽控嶺扼崗之會曾建旌牙襟湘帶沅

之區重開榮戟貳卿清職典守乎嘉禮祥刑肅政崇階管攝
乎中銓左選以台斗而總節麾之任保障是膺惟東南實爲
財賦之都輸將攸賴何期溘逝彌切軫懷考憲易名諡之勤
懋嗚呼指順帆於千里尚念江淮轉運之功表豐碣於九原
聿彰夙夜靖共之誼載輝重兆俾荷隆施

詩四言古

元

牧樵子草蟲

吳澄

維野有牧見彼于于維山有樵見彼嘒嘒子豈樵夫子
豈牧豎于何見聞深解蟲趣牧樵子言此論未然聞聞
見見得者淺淺維蟲能天天固在我非牧非樵亦何不

可

春暉堂詩

有序

何中

清江黃伯原母弟七人孝愛友恭作春暉堂母年
七十奉觴堂上子孫滿前內外姻友咸集今集賢
直學士草廬吳先生序其事國子司業大魁張君
起岳繼之名士大夫詩詞交贊斯母亦榮矣吾鄉
陸子靜兄弟孝友閨門雍穆累世同爨無閒言事
聞旌表余嘗至青田其廬觀故址存焉雖然子靜
以道學鳴其實履也固宜若伯原兄弟起家詩禮
卓然不滓於俗其實履如此尤難也伯原以此求
知之於人而人樂誦之者秉彝好德之心有不能

自己而然惜乎觀民風者無其人不獲達於天朝
旌以勸之使四方後代有所感慕而興起也余旣
羨斯母之榮又嘉伯原兄弟之粹乃從而爲之詩
遲遲春暉舒舒寸草滄溟易竭母恩莫報 春暉遲遲
寸草舒舒其報伊何孝友弗愉 母在高堂子孫環序
觴俎靜嘉式燕式裕 七袞遐齡樂只無央有子而賢
乃壽而臧 豈無萊庭高牙大纛豈無疏榮金花鸞誥
匪回而污則蠹而殘淑春斯母子行俱完 河潤斯
澤晉薰乃良曷施其德俾燠其涼 懿歟休茲八龍濟
濟斯堂斯母孔多受祉

明

茅屋讀書

劉永之

峩峩蒼山白雲冒之靈液滲漉瀉爲清漪帶我林薄環
我蓬茨春日載陽卉木華滋呦呦鳴鹿泛泛鳧鷖叙此
幽獨理我琴冊嗟彼聖賢遺我令則顧瞻周道寥落在
草駕言從之中心燥燥澗有蘭茝山有蕨薇逍遙卒歲
皓首爲期

詩五言古

宋

答原父

歐陽修

炎歊鬱然蒸午景熾方燄子來清風興蕭蕭吹几簟又
如沃瓊漿遽飲不知厭嗟予學苦晚白首困鉛槧危疑

奚所質孔孟久已窆羣儒室自私惟子通且瞻幸時丐
贏餘屢得飽饑歉嚴嚴春秋經大法誰敢覘三才失綱
紀五代極昏墊盜竊恣眚篋英雄爭奮劍興亡兩倉猝
事蹟多遺欠纔能紀成敗豈暇誅姦僭聞見患孤寡是
非誰證驗嘗欣同好惡遂乞指瑕玷反蒙華袞褒如譽
嫫母豔救非當在早已暴何由斂苟能哀廢痼其可惜
鍼砭風船或許邀湖綠方濫濫

送楊申職方通判信州

梅堯臣

從來饒信吏愛寶襲侈越莫買冰玉盤蒼山斲明月明
月有時生窮巖有時竭君常抱清節歷職老無闕與我
年齒同獨未變華髮又爲江外行畫舸羨明發

謝劉原父

劉公漢家裔才學歆向儔胷中飽經史辨論出九州曾
不奉權貴但與故人投贈辛非贈甘此意自當求

依韻和原父廳壁錢諫議畫蟹

諫議吳王孫特畫水物具至今圖寫各不減南朝顧濃
淡一以墨黻殼自有度意將輕蔡謨殆被螭螟誤

桐軒晚坐

劉敞

孤軒遶危桐颯颯聞鬧雨驚起瞰前除飛花亂如舞輕
香密侵席晚景寒當戶玉粉散游蜂珠華濺高宇紛紛
綠苔上半已隨泥土邈彼丹穴鳥何年翥文羽芳時不
可驟歲晏聊容與

秋霽燕北軒

北軒屬秋霽晚見風葉零置觴命賓友環坐飛淥醽遇
適輒獻笑放言豁中局兀然不省醉起見天上星勉強
相勸引我謠子宜聽幸無兵農憂稔歲蒙休寧讀書業
文外惟有醉勿醒世途若波濤富貴乃浮萍置之無可
稱視彼鴻杳冥

和貢甫送元考不至

曾鞏

蓬山有行客欲上北城舟學問本闕博言談非謬悠嘗
考帝王略得試紫雲樓一時驚豪捷况復富春秋朋游
所欣附爭欲致綢繆承明動鄉思歲久道苦修忽懷淄
川組夙昔願始酬出餞集儔侶情歡期少留酒闌竟不
至睠睠久臨流微我獨有咎此詩聊可求

出宰清江省親秀水

李觀

天關抵清江萍泛七千里心目注庭闈恍如尋尺爾河
伯念微衷風師薦嘉祉澄瀾翼順颿庭前堪屈指

送任師中任清江詩

蘇洵

吾老尚喜事羨君方少年有如伏櫪馬看彼始及鞍奔
騰過吾前蕭條正思邊誰知脫金羈傲睨登太山君今
始得縣翱翔大江干人生患不出局東守一廛未嘗見
大物不識天地寬今君吾鄉秀固已見西川又當適南
土巨浪泛目前胸中芥蒂心欠盡爲樂田陳湯喜彤勝
所至常縱觀吾想君至彼胸臆當豁然

劉公詩 有序

孔武仲

吾鄉劉原甫雄文博學爲天下師表四方士大夫
登其門執弟子禮者足相踵也而余不及識今識
其子仲馮仲馮居省中治事精密吏不能欺應接
不倦甚得士大夫心天下稱爲賢吏部其文學議
論能世其家余自京師南出過鄆陵興國寺入金
剛院見原甫判蔡州時題詩四句在壁曰寂寞空
堂欲暮時鐘聲斷續雨千絲此中會有西來意只
少庭前柏樹知乃錄以寄仲馮請附入家集中因
爲詩道原甫平生以見余愛慕之心云

原甫吾不識聞之士大夫少時已絕羣卓犖千里駒讀
書足智慮萬卷力有餘善發六經蘊高談詆先儒天文
地理學道藏及浮屠纖悉無不講講之皆粲如文章弄
豪贍咳唾玉與珠散落八極閱買者論錙銖爲人又挺
特不與俠者俱伉健虎獨步軒昂鶴仍孤身雖登兩禁
未及秉鈞樞爽氣隨沈澼斂收入清都嗟嗟劉夫子信
是荀揚徒富貴非窮愁而復多著書荒城過宿雨古寺
入平蕪鬱鬱壁上字奎鈎照天衢我來值日暮篝火爲
脚踟想見其風骨磊落眉宇疎邦人好事少不以玉石
摹歲月更久遠彫摧逐泥塗作詩貴述美聊用贊不渝

薌林

朱子

東臯濺寒水西崦饒清陰南埭奎壁麗北垞靜且深入

清江縣志 卷十九
門流綠波竹樹何蕭森積石象雲壑高堂杳沈沈右通
雪水區左逕梅杏林沼沚相同薄觀臺鬱差參紛吾千
里游發軔南山岑過門得佳賞慰此夙昔心緬懷企疏
翁歲晚投冠簪婆娑此澗谷俯仰成古今嗣德世有人
聞道我所欽相見無雜語晤言寫胸襟懷舊復惆悵命
酒聊同斟飲罷我當去握手清江潯

清江臺在臨江郡西岡上張安國題榜

范成大

南來富壽岡形勝此蟠結岑嶢戴高臺闌檻了風月蕭
灘曳長烟閣阜炯殘雪江流當帶橫練練浮木末天風
來無鄉萬里吹醉纈登臨信奇事忍凍亦癡絕故人春
夢覺遺墨秋蛇掣浮雲眞可哈揮觴醉空澗

美郡守王蓮禁羅雀

李大異

清江有奇饒飛爵金染裾但爲挾綿纈不能保頭顱紛
紛墮畢弋往往充苞苴公帑每市之歲戮三萬餘庖丁
奏膚功香穰雜清蔬瓶罌走四方道路日無虛使君桐
山裔手握銀兔符筆端散雷雨千萬歌來蘓下令禁羅
雀遐邇皆歡呼我聞惻隱端本原孟子書匍匐當亟拯
穀觶當勿誅作詩諗後人此意不可渝

清江勸駕送舉人二首

王炎

藏山有良玉潛淵有明珠寶氣露光彩見者詎肯遺賢
士抱良貴又與珠玉殊方其未達時眇然一布韋時來

取通顯乘軒而執珪鶴書出閭闔嗣聖清明初彈冠今
彙征駸駸上天衢顯親與事君忠孝兩無虧

黃堂暫虛位勸駕屬守承金石方過密不敢歌鹿鳴吉
蠲置觴豆少洽賓主情西風吹桂枝馬首將東行春官
奏高第天子開延英親策降清問健論攄丹誠解褐躋
臚仕何止爲身榮二劉與三孔至今流芳馨願言踵前
修勉矣垂令名

題韋同年聚遠閣詩

臨江作

塵蒙萬家市中有壺公天翬飛倚空翠吞吐無中邊江
遠益淵洄山遠益清妍雲霞之斂散竹樹之竿綿羽鱗
之翔泳舟車之往還物色四面來輸入檐楹闕境遠心
亦遠意將隘人寰我嘗觀洞庭水與天相連流光浮玉
鏡萬象以包涵又嘗登天柱衆邱如髻鬟孤鴻滅沒處
寓目行中原蓬轉墜江城此身縛微官今代韋表微懶
著進取鞭尚記千佛名亦許時扣關自疑脫凡骨構此
樓居仙江山開畫笥使我心悠然是中有真趣可得不
可傳客至勿揮塵但與浮觥船

從道益聲自清江送至樟鎮別後書懷

羅公升

故人難合并貧路惜羈旅孤篷遠追送未怯危路阻當
年滕王城跌宕欣得侶朱顏侮華髮笑口失愁緒那知
更世故俠客變處女西風淒破帽細雨雜慘語羽書雖

云急飛竿未忍去嗟余百憂集俯仰輒齟齬蕭然一匏
笠四海莫我處斷崖揮手時別意寫雙鱗夜闌江樹搖
尚想客凝佇

清江何漢英再見於空同讀歐陽先生詩感慨爲賦

文天祥

采芝雲滿山采藥瀑垂澗當年有清徽爲寄南來雁雁
去人已逝歲月剗云晏流水失聲音西河老憂患往日
志士悲窮途行子慣君爲梁宋遊我復江漢官十年耿
相逢千里欠一盼元機寄糟粕美疾墮芻豢贈子歸東
方聊薦吳興莧

宋武帝廟

楊 雯

溪聲答松風巨石出老拳古樹不知名岌岌蛟龍纏夕
陰互出沒秋華帶芳鮮葱葱帝王氣棟宇垂千年虎賁
秉霜戟慘澹生雲烟宮人翠龍駕手持玉連卷昌明坐
恍惚精神靄在天大呼司雍間旬月無秦燕昔爲萬夫
特今受衆目憐石馬亦埋沒歲時草芊芊小臣異代士
見之淚迸泉齊人思爽鳩蜀人哀杜鵑江東舊正朔禮
奉敢不虔但願君王心不忘載荻船下山又再拜白日
當空懸

元

贈清江楊信可

吳 澄

往年疏齋老同看廣陵春起予五君詠字字春條新歸

來西江上始識詩中人騷人已千載此土遺蘭蓀吾里
吳仲谷詩格逼盛唐視子唱酬篇與之鴻雁行有文更
奇古腹笥儲三倉清時需髦士一子天際翔

雨中次范德機見寄雜興韻

鄧文原

窮巷積陰雨離居寡悵情安得埽埃風逍遙余上征長
日有逝川春花無晚榮永懷山澤居好遜潛英聲於陵
方灌園龐公不入城此意豈忘世詠譎以濯清今我夢
江國噉噉鵝鳩鳴不憂芳草歇但恐白髮生歸休企前
哲矢言著貞誠悠悠莫識察思子攜手行

荷湖市岐山觀與友人皮季武同遊

何中

旦旦望岐山樛木生山椒其下美清蔭仙真集蕭寥佳
友謝塵慮導余度飛橋危濶濺跳雪石磴藏靈飈探邃
裂凝陰憑巔洞遐霄寒蒼貫晴紫滉漾峯壑遙久無登
臨適快此煩祛消日馭諒難迅人區亦非遙遲遲敢迷
復甕甕同歡謠

樟樹鎮五公寺

久幽厭拘維暫弛欣舒散近關得禪扉擇步歷蒼蘚沈
沈松陰重澹澹水光遠殘花起餘香乳禽響新囀虛廊
清晝長高僧坐談簡學空素所昧慮妄一作還自遣移
晷始知歸生烟滿林晚

清江鎮靈峯寺員嶠亭

拔迹嚮塵區置身清涼境深深蒼松林炎曦不通影松
根得散坐肅然心自醒閒草膏以綠新蟬炯而警元非
造幽邃已足移視聽何當真物外無慙虛與靜

閤阜山鳴水臺

兩山扼一峽幾丈落寒水蜀灘春濤壯吳江夜潮起靜
聽得天韻冥參洞元理遠得還未能淹回成自喜幸茲
有臺亭綠蔭極清美霏霏林香生郁郁山光委本非塵
土胸偶此一流憩所聞盡心聞我耳毋煩洗

和臨江饒自然夜坐

劉 詵

庭樹秋月高危葉光欲墮孤蛩感涼氣唧唧稍近坐鄰
家弄機杼微燈出窗破寢齋生新苔禪綯掩關臥

楚石瑛藏主自蔣山歸却欲就叢林閱藏同舟清江
之上賦此贈之

虞 集

手攜北山雲却上西江水月明洲渚生葉落風不起虛
舟不移棹寒波釣金鯉銀河轉碧落北斗去天咫龍吟
匣中劒虎躍弦上矢殺機誰敢當吹毛豈輕試貝葉啟
千函木榻脫雙履唯應勝壁觀悠悠度年歲

九日報熊敬輿

范 梈

羸疾卧江滸承恩慰高秋木落鳴階淨天朗氣暄柔便
了晨光中授我雙螭蟬呼童敬薦之風味宜南州憶昔
客燕薊白雲從方舟於時見此物千錢三十頭打黃試
新羹爛醉天市樓一日食一百更爲明且謀三日困暴

下傳笑諸公侯此邦誠罕見初出一作市愈難求矧當浮
英日傾道俗如流厚價得兩整持之比琳球物有少爲
貴感事重綢繆奈何雷同者政復多優游欲折黃金花
報君向滄洲此花苦未發少待歲寒酬

清江黃氏池亭

亭名玉壺水

揭傒斯

新亭環碧池池水何漾深偶攜塵外侶薄言此窺臨惴
惴若有畏憑憑如弗任旣抱執盈念仍懷履薄心白日
麗晴暉微風在遠林洞然忽無際激明諧素襟還君玉
如意理我雲門琴

杜原父自清江訪予鍾陵留款旬餘將還武夷山中

柳貫

原父志完潔聞道實先吾定交自錢塘暑霜三十踰京
華亦繼見失路各崎嶇區區抱兩琴混合萬齊竿吾人
許與心固有弗占孚講談必跋燭遊衍每聯裾蒙霧不
知潤披荒纔啟途君歸得超越我留類踞拘八年忝京
秩踏鼓厭晨趨偶紆江西綬言訪玉人芻企瞻雲谷雲
隨風時卷舒夢中反招隱覺來聞過車感別欣繼見相
看情紛如數宵復款洽深懷爲之攄歎息吾道存斯文
豈其孤後至邈未逢前行逝將徂寧觀以俟之曷日免
淪胥吾年屬須暇追惟刪述初英莖以論樂點畫以成
書有理有聲形道隱言亦無擊蒙非揣想發蔀得昭蘓
新聞啟吾聽宿說豈能誣匆匆上瀨船言返粵山居幔

亭老曾孫道景驂雲與計程兩旬浹到家改蟾蜍况茲
詩書窟咫尺文公廬漱芳酌巖液嘑道擷烟腴初非山
水淫將為造化徒定開懷友軒呼童重汛除布筵齊舊
帙掃壁張新圖友道繫倫理別久會常疎津津麗澤益
許許伐木呼詩人有行涉尚或歌叩須所以千里駕但
取一夕娛存沒與升沈蹈道本無殊跡住雖異方神遊
實同區落月屋梁色疏梅窗外株此意方寥寥微君誰
起予勉勉雞黍期茫茫冠蓋衢美詩慚報貺緬彼貂襜
褕

贈杜清碧

薩天錫

夜宿武夷山乃識清碧叟清談道人同險語山鬼走出

門視河漢危梯挂星斗白露薄芙蓉清寒夜深久

題張伯龍書屋圖

傅若金

清江帶茅宇絕壁連松寺溪響漁未歸橋聲客應至數
鴉林外落一犬庭陰睡終日對羣書焉知俗閔事

送楊信父歸臨江

黃清老

自別武夷君海水落幾丈當年樽俎地顛倒疊橫嶂君
從山中來應見桃花開秦人笑相語愧我非仙才茫茫
八極中雲月秋徘徊苦吟不出門孤負黃金壘劃然西
風生拂我琴邊埃願從雙白鶴去去不復回

送劉仲修

戴良

各都鬱佳麗公室赫一作兼宏敞續續一作紛集時彥袞袞

歸世網若人固忠勤受命逾震蕩藩國簡車徒邊庭巡
境壤道途邈以負山川修且廣月宵抱影息霜晨流念
往仰看零露團俯聽悲風響景物勞夢思驅馳罷心賞
去水無回波長塗有徂鞅臨分恨莫留搔首獨長想
明

奉答定使君巡城詩

定爲臨江路
達魯花赤

劉永之

驚焱激層觀垂游曳輕素俯觀滄江流遠見平郊樹鳴
柝警重關然烽應遙戍英雄受藩寄巡省當秋暮行幙
濕晨霜迴鑣沾夕露眷茲凋敝氓憂情諒深注貞詞敷
麗藻嘉猷啟元悟終當肅氛殺海宇同清曙

聞清江罹難甚慙愴然有懷

大江浩東注孤城未合圍驚飈起西南戈舫驅如飛生
兵意自異鄰救盟屢違焚牛計未展脫兔事還非星奔
填四門雪散溢九逵追騎左右至白刃縱橫揮

和鄒椿齡見寄韻

鄒清江隱士

憶昔西郊道觀游盛儔侶但念新知樂寧諳生別苦風
起青蘋末塵飛大江渚孤鴻竟安託驚蓬離故所容易
十年餘憂來誰能語

自郡城歸醴溪寄劉仲修

梁寅

大川日瀾瀾孤旅何嬛嬛憶與君子別嚴霜已再更方
春有行役兼旬滯荒城文史貴探討朋儔庶合并中野
見流鴻灌木聽鳴鶯逍遙煦風至臨眺滄波明伊人獨

難期方舟徂遐征我亦懷空谷靈雨促僮耕悵望東南
雲聊寫憂思情

逸士錢慎修有別業在清江之上竹樹茂美爲題其
壁

胡行簡

結廬倚江渚竹樹映清瀾幽人塵事少日夕弄潺湲鳴
琴磐石上讀書綠陰閒沙鳥時親人汀雲共往還素侶
暇相對爽氣溢櫺軒隨時薦溪毛春景屬芳樽永謝榮
名慮得意復何言

思紹堂

胡廣

清江杜徵君高節天下聞脫屣視簪紱富貴薄浮雲託
迹武夷山著述撥元文究極陰陽蹟窮探造化垠上以
明義畫次第及典墳尊王抑伯術欲界仁義敦剖析康
節徵性命及本原雅志尚千古懷友敞幽軒超然萬物
表鸞鶴騰孤騫斯人旣已遠遺芳有餘芬世澤固不泯
傳家見諸孫華堂揭思紹仰止恒著存盛德必悠久所
以隆其昆勗哉嗣續者肅慎承清門

下銅塘口

王直

泛舟銅塘口截出樟樹鎮江迴水百折風雨一何盛望
望淵渚長迢迢入烟暝牛羊被阡陌桃李紛相映人家
依古樹寂寞柴門靜雖無車馬客而愜魚鳥性徘徊念
鄉邑山川愈寥夔未能秉耒耕寧免彈冠慶素餐良足
諒幸遇唐虞聖誰謂行路難權歌滿清聽

澹軒爲清江黎氏作

曾鶴齡

靡靡流俗弊紛紛士習乖被服崇紈綺雅音變淫哇譬
彼泔水流蕩瀟將無涯偉哉君子徒超然異等儕浮華
非所願澹泊素所懷招隱入蘿徑遁迹結茅齋烹葵味
自甘聽泉韻自諧屣履步林澤時復緣雲崖顧盼生清
風此道誰與偕

東溪爲裴益之作

敖英

我愛東溪水春流綠似苔白蘋香縹緲隱約鏡光開下
有蛟龍窟常疑風雨來

我愛東溪石金沙掩映寒狼牙兼象鼻斲鼎可燒丹更
有玲瓏處還堪插釣竿

我愛東溪樹婆娑兩岸陰飛花迷曲徑更比武夷深不
見漁郎至科頭樹下吟

我愛東溪月流光渡石梁溪風吹不斷葭菼共蒼蒼細
搗長生藥誰憐玉兔忙

我愛東溪屋檐飛閣阜雲紫芝滿庭秀鸞鶴自成羣聞
說浮邱伯吹簫欲訪君

贈敖子發用陶韻

鄒守益

束髮懷耿介高談望唐虞古人不可見見之詩與書竭
來被優恩飛蓋入留都常懷草木變坐令歲月踰所賴
傾蓋交周道駕征輿逝言策款段夙夜思與俱關河忽
睽隔執手步踟躕豈伊懷燕昵意氣交廓如嘗慕西銘

翁聖道關榛蕪充其純王業萬國咸康娛秦川多豪傑
臯比跡未疎行矣下車令變化在卷舒

楊淑文一室一德一誠陸子容張景仁甘澗之范元
旦諸生登樟樹鎮華光閣懷陽明先師

憶昔從義師萬竈屯組練一戰鄱湖清妖氛迅掃電及
茲三十載重升華光殿樵漁歌清平哲人不可見江清
上皓月髣髴挹顏面慷慨帶礪盟青山濕羣彥軍賞昭
合宮浮言寧久煽會有徐福書殘雪消天現

唐斗山郡丞遣使持惠讀書臺詩賦此紀謝

蕭允儒

世路岐燕越傾蓋誰爲歡美人起湖湘分符蒞蕭灘過
存衡門下讌語芬幽蘭佩我百和英將之金琅玕琅玕
何鄭重三復聲珊珊勗我景前修高義切雲端感此綢
繆意展轉坐更闌愧無瓊瑤報惟有寸心禪楚山聳天
外北斗正芒寒願溥高明德四海慰彫殘

峽山寺

徐穎

閣阜東峯三折北逕四里爲峽山寺瀑水滙其門
竹石高寒自成一壑中有百歲僧

峽雪涸冰泥春氣不得上竹柏結高寒寺門闕青嶂泉
從東峯來神丹有遺響飲者不知功齒髮日加長

文昌閣

梁士濟

高閣連雲峻登臨萬里親悠然小天下座上列星辰閣

清江縣志 卷十九
山橫黛色拱揖若來賓俯矚大江帆太虛一點塵谷風
飄暮雨吹徧萬家春不騁雲霄目安知天澤均觀世得
無礙高明不瞰神迴首京華望天邊析木津

甲子日喜初晴

俗傳初夏甲子日晴則風雨調和雨則亢旱不收
壬申春月苦雨傷稼農家皇皇咸待甲子爲卜及
期果霽士民相慶守土吏免於讐尤矣欣然賦之
積雨春連夏青苗半欲黃田家屈指計甲子定饑饉未
卜終年飽先憂輸輓忙呼吏吏何答呼天天不忘及晨
日杲杲下土遍輝光千耦競耘耔皇穹迄降康疆域何
多難師行必裹糧天祚符嘉德受命政溥將盼饗徵時
若有年書上祥蕩平從此兆臣請拜稽颡

四誠歌

秦 鏞

勸君勿作賊作賊非良圖疋布與斗粟所得亦鎔銖奈
何惑且狂以之喪其軀從今好爲善明朝有赦書 勸
君勿爲盜赤子塗肝腦黠捕利可啖廉吏恩終少天網
故自寬雷電欲相繞一朝法鏡臨頭顱卒難保右誠竊盜
江濱有奇俗積習傷雅化生男事他人生女不出嫁男
去離膝前壻來寄廡下如登傀儡場骨肉緣皆假兒亦
自有父兒亦自有母一朝兩決絕斑衣向誰舞力田供
子職責逐逢彼怒迴念生我恩泣涕淚如雨兄亦自有
弟弟亦自有兄云何陌路人肩隨且徐行本非共樹花

安有棠棣情一朝相殘賊方知恩義輕哀哉父與母何
忍棄其子財帛重邱山骨肉輕敝屣荏苒向衰暮莫敖
鬼將餒生子棄路旁胡不念宗祀生女年十五爲作嫁
衣裳鼓樂相導送嫁與誰家郎上堂問舅姑入厨作羹
湯舉案復齊眉古有賢孟光云胡今不然贅壻稱東牀
止抱衾與裯中饋靡所將雖復諧匹耦兒夫氣不揚妾
身已生子不知拜姑嫜更有未亡人撫孤不下堂忽有
鬚如戟來窺舊時粧兒女呼阿翁親族舉賀觴倫理殆
滅絕夷俗真可傷恩男與贅壻舉國皆如狂願言一丕
變醇俗臻羲皇

右誠恩子
贅壻

風人刺雀角大易戒終凶世無魯仲連排難欽古風薄

俗好相競蝸角爭雌雄無情恣羅列掉舌鼓兇鋒不念
蚌蠃持傍有漁家翁衙胥羅網張市猾智計工唆食衆
皆飽贖緩又輸公相顧各悔禍囊橐亦已空訟理未得
直不如歸課農靜觀萬物理强者必先終屈伸如蓬轉
天道如張弓勞攘復何益驅納網罟中安得世無訟園
扉草色濃

右誠訟

古人亦有言一死輕重殊喪元固勇士溝瀆祇匹夫強
者挾眦怨瞋目語大呼因之陷刑辟駢首伏法誅弱者
受侵辱憤惋氣不舒不惜赴溝壑魂魄飛幽都嗟彼仇
家子不諳官刑書憾言欲相抵載鬼遂一車願告蚩蚩
氓輕生一何愚隸籍枉死城招魂北山隅當念親生我

身體與髮膚此生雖貧賤慎保七尺軀右誠輕生

國朝

臨江叅軍

吳偉業

臨江髯叅軍負性何貞栗上書請賜對高語爭得失左
右為流汗天子知質直公卿有關遺廣坐憂指摘鷹隼
伏指爪其氣嘗突兀同舍展歡譔失語輒面斥萬仞削
蒼崖飛鳥不得立予與交十年弱節資扶植忠孝固平
生吾徒在真實去年羽書來中樞失籌策桓桓尚書公
提兵戰疾力將相有纖介中外為危慄君拜極言疏夜
半片紙出贊畫樞曹郎遷官得左秩天子欲用人何必
慙顯職所恨持祿流垂頭氣默塞主上憂山東無能持

緩急投身感至性不敢量臣力受詞長安門走馬桑乾
側但見塵滅沒不知風慘慄四野多悲笳十日無消息
蒼頭草中來整暇見紙墨唯說尚書賢與語材挺特次
見諸大帥驕懦固無匹逗撓失事機倏忽不相及變計
趣之去直云戰不得成敗不可知死生予所執予時讀
其書對案不能食一朝敗問至南望為於邑忽得別地
書慰藉告親識云與副都護會師有月日顧恨不同死
痛憤填胸臆先是在軍中我師已孔亟剽略斬亂兵掩
面對之泣我法為三軍汝寔饑寒極諸營勢潰亡羣公
意敦過公獨顧而笑我死則塞責老母隔山川無由寄
悽惻作書與兄子勿復收吾骨得書或相見且復慰家

室別我顧無言但云到順德倚角竟無人親軍惟數百
是夜所乘馬嘶鳴氣蕭瑟椎鼓鼓聲哀拔刀刀芒澀公
知爲我故悲歌壯心溢當爲諸將軍揮戈誓深入日暮
箭鏃盡左右刀鋌集帳下勸之走叱謂吾死國官能制
萬里年不及四十詔下詰死狀疏成紙爲濕引義大激
昂見者憂讒疾公旣先我亡投跡復奚恤大節苟弗明
後世謂吾筆此意通鬼神至尊從薄謫生還就耕釣志
願自此畢匡廬何巖業大江流不測君看磊落士艱難
到蓬華猶見參軍船再訪征東宅風雨懷友生江山爲
社稷生死無媿辭大義照顏色

鹿江寓舍贈別

黃尚賓

風吹石城榜千里來吾廬滿眼正新綠君胡憐萎樗任
俠自古難於君獨何如憂人量所及畸衆性攸殊慷慨
負高義謀施匪自居三江水東逝君行復西驅良晤應
不易黯然惜居諸

慧力寺同伯調阮懷耦長作

施閏章

高人憶名山良友喜初至首夏宜薄遊言憩城南寺入
門蔽晴曦蒼寒變天地陰崖多古屋疊巘懸孤亭亭空
面江汜江漲雲冥冥飛帆過虛白秀幹攢高青仰攀松
上蘿俯想松下苓騁興發清歌懷古追往蹟坐有匡廬
僧同遊談夙昔瀑泉忽洗耳五老若咫尺草堂志不就
屈曲當何益日暮棹舟歸還念山中客

集就亭

臨江官舍有高阜余就而亭之下臨蕭江前對閣
阜山名曰就亭

安拙成寡管賞心惟坐嘯結構期自然孤亭恣遊眺惠
風始駘蕩旭日先照耀埤塊帶清源青冥開遠嶠野老
或荷鋤舟人時鼓棹雖違邱壑情卽事見耕釣遐矚有
餘懷臨觴難具道

自金鳳洲汎舟至迴龍寺

芳渚緣城南精廬帶江汜雲樹暗千重沿洄才數里上
已忽過眼春光疾如駛嘉會得良朋良辰歡雨止草齊
水逾碧艇進鷗不起野坐憩雙松江回攬香芷適意且
放歌笑看東流水

鹿江精舍書懷

祇役越郊坰小憩樓招提短垣傍疎竹野色來侵衣晨
登最高閣宿雨初晴時潦浮邨徑沒帆挾江雲飛塵市
久喪亂桃李還芳菲蒼鷹自多食白鶴常苦饑束身忍
驅策黽勉筋力微四十已云邁庶幾知前非

愚樓獨坐

雨歇開耳目檐際喧鳴禽言登百尋閣送此千里心婆
娑池上樹叢桂多清陰芳華隨風發悠然披我襟白雲
近可擊斗酒時自斟且復歡此日何羨南山岑

和就亭詩仍用嘯字

丁宏誨

澹靜常得閑公餘發清嘯編竹纔數楹曠觀已居要雉
影疊風帆蜃光散雲嶠木葉下微霜江流日奔峭登亭
讀新詩賓從有同調永懷謝宣城淨練澄夕照

施少參招同伯調耦長過慧力寺 高詠

湖西城南端緬逸多連林夏首天宇和綠疇布繁陰使
君眷邱壑風日暢追尋朋好亦具來招攜偶然遂松路
暝晴雲蘭皋竦輕轡蒼蒼鬱平楚遠見唐朝寺古殿被
陰苔飛甍出深翠當門蕭水橫急漲如奔雷水光蕩虛
碧金地無纖埃冠山成新亭四角臨江開環亭秀嘉植
枇杷及桐槐遊子憺忘歸披拂散愁疾佛院吹名香僧
厨飲落日高懷盧嶽社能事滄州筆沙晚水禽稀風定
飛蟲密孤郭聚帆檣烟火橫江出

蒞講觀瀾書院示諸生

陳克峻

洙泗日以遠濂洛闡微言清江講學區考亭蹟尚存止
堂與主一師友道同尊風徽應未泯遺緒堪討論英英
二三子講席俯江干讀書貴聞道勿云觀海難向若莽
涯涘要在觀其瀾勉旃力前修袞袞達泉源

錢存拙留余長沙官署周載矣於其歸寄語楊商珍
諸子

昔別清江隈今別楚江涘木落澄潭空雲飛帆影駛吾
老眷舊遊契瀾念諸子寄語近何如修名毋自弛

送陳擎石太守還牧臨江

葉方芸

江水寒且深江雲散復沈送客當此際有酒不能斟而况太守公久爲江西霖臨陽故在目何必屢遠心

納涼萬竹庵

喻成龍

萬竹庵舊名永慶庵乃前監司施愚山改題而書額則無可大師也二公德業文章海內景慕有若饑渴余來觀此不勝閑庭繫馬之感旋散步林間青翠襲人炎暑頓失汲泉烹茗斂膝危坐邈焉忘夫塵表至暮垂鞭吟咏而歸

嘉禾生玉山終爲鸞鷲有靈谷產紫芝獨宜隱者壽由來多梗塞良以失牝牡所貴蘊真士軒然越塵垢顧彼池中鱗一息尚喁喁鵬翮振冥杳何知虞羅咎持此悟達生與世誠莫偶神融得晏如八極恣矯首逸興任邁飛幽討欣林藪精藍俯北郭竹木森戶牖留詠盡各流棟宇新增後題額自愚山書出愚者手愚者爲吾師愚山爲吾友二公俱膠漆已隔泉臺久詞翰故絕倫於茲庶不朽延賞極蕭疎中情無所取茗香鳥雀喧人靜鼯鼠走旣夕泛馬歸新詩猶在口緬仰追芳蹤斯遊亦云厚

遊閣阜山

謝天翼

松風起寒澗四山皆杳然我來覓仙蹤丹井如昔年著衣悵臺圯搗藥惟鳥傳山有鳥名搗藥鳥攀藤過仄徑摩石躋危巔蕭蕭木葉落片片隨清泉白雲能我期草堂修竹

邊

督漕楊尚書夫人輓詩四首

蔣士銓

母生禮義門是爲君子耦三命拜鸞封晚號尚書婦夫
子古醇儒帶經起田畝母篝鳴機鐙端坐讀書牖修齊
切交勉平治別先後鏘然珩璜聲琴瑟得其友緬昔賢
媛行于母無不有臣妻本地道載物徵坤厚

尚書起郎官敷歷及中外持節莅封疆內政維母賴諭
翟居華堂荆布忘尊貴蠶纈供衣服諸婦不敢懈布惠
無親疎萬物感其愛肅雝著家庭善氣蒸和泰依然梁
孟儔白首笑相對

五歲便謁公二十出公門坐我諸郎間仰承色笑溫玉
堂祿養薄我母依晨昏尚書督漕運歲一瞻

至尊仙查眷屬從聚晤同欣欣母聞我母來握髮禮意殷出
迎笑執手葛帔大練裙豈無一品服澹泊性所存紛紜
貴人妻聘貽無所云名臣古家法富貴真浮雲

泛家過清淮舉室登北堂夫人酌吾母一飲盡十觴星
霜忽五易媿婆徒相望驚聞步虛游鶴駕空中翔我母
北向泣我婦燃瓣香我哭母或聞緘淚瑤池旁生榮歿
則哀考終亦何傷所嗟白太傅老爲梧桐愴達情齊死
生眠食祈若常大椿八千歲爲國珍棟梁

懷人詩

楊勤懇蘭晚先生

尚書領度支督漕九州喜河流澤溶溶俎豆分祠祀一

卷一
裘三十年視國如家事

登郡圃西岡是宋時清江臺舊址范石湖有詩和其韻
李昌昱

浮雲聚復散春花落還結空感銅雀塵誰嘯南樓月古
今幾興頽歎如風飄雪矧此清江臺孰與究顛末閣阜
橫青屏蕭水飛素纈川原展高眺風景故清絕吾心自
能寫此肘誰相掣閱詠石湖詩襟期何壯濶

江城古蹟詩十二首

錢時雍

朝登望仙樓徙倚高城上仙人去不還千載空相望我
思吳世雲學道良非妄不苦蚊嚙膚惟幸親眠暢至孝
幼所根栖真情自向一筵畫長江小術聊跌宕世人慕
長生貪癡徒自障至性已先死形骸隨凋喪至人但神

留乾坤長清曠

望仙樓

寒泉古墻陰不涸常不溢曾聞地脈通乃自山君出孝
子守親墳相依銜憂恤江遠行汲艱跑地疏堙室至性
神明通豈俟化人術至今故蹟存誰與表幽佚爲置孝
感祠典祀春秋秩庶使風教彰羣倫生祇遘

虎跑泉

咀阜出城曲頰瞰長川流江山入流眄勝槩遠堪收龍
石鬱蜿蟺蟠屈出靈湫盧君石礪上久住力藏修楚玉
豈輕銜隋珠不暗投衛公具先識一見卜龍頭發機良
有自感生競渡舟紛紛寶燕石孰與論奇尤

覽勝亭

不值冰霜厲不識後彫松不逢顛沛日不著貞義衷唐

季方搶攘劫斂徧交証魯婦柏舟志避迹憂忡獨抱
前室子已生走相從抱長置其幼粹與寇相逢相逢乃
相詰感此斂兵鋒由來爲後母前子罕見容履霜徒哀
慕蘆絮禦寒冬可憐孝子心慘切泣蒼穹竭來風義里
俛仰弔幽蹤述此貽後母庶溥聖善風

風義堡

叔度主邦計國裕家仍瘠歸橐何蕭然遺業存經籍留
翁翰墨林播穫絃歌席世守相留傳先疇日開闢不種
午橋花不珍平泉石藹藹靜春堂韋編玩義易耕道耨
仁義學古良有獲巧宦營貲產膏腴廣莊宅惟儲干祿
書守彼兔園冊習俗日凌遲慨焉感今昔

墨莊

日度萊公嶺誰思名嶺義江城昔建軍茲爲校閱地嶺
以射堞稱後乃驛館置寇公被萋斐粵海遠斥棄南來
過蕭灘止驂安卽次後人仰光儀過化相標誌歲久萊
呼雷音譌失本意舊乘失參稽不復究前事拾遺爲十
姨小姑空斌媚書此正俗謬高山深仰企

萊公嶺

鷹過傳餘聲龍過有餘腥名賢駐游轍後代仰芳型蘇
子海南歸所到車輒停曾聞憩山寺留寫般若經寫經
或然否留宿非杳冥當日謝民師論文對僧庭奇賞信
知已情洽遂忘形閑來訪遺躅覽勝陟山亭長江瀉碧
玉遠山出翠屏清風生竹樹愴接精靈

寫經臺

昔聞企疏老勇退謝急流選勝清江曲樂此林澗幽扶
疎樹遶屋芳馥花滿洲薌林出宸翰勒碣向城陬高風

清江集卷一
照區宇清韻長悠悠嗣世聞聖學切劇集名流考亭思
舊兩千里遠來游佳賞慰夙昔信宿深綢繆古人不復
作芳軌莫相留仰止荒林外空觀白雲浮

薜林

清江滙雙流驛道連閩楚考亭昔遠游經過亦云屢况
復吾邦賢夙多同道侶停車爲挽留盍簪欣宿處憶昔
紹熙年歸自星沙渚停驂向驛樓買舟問江許後學企
芳蹤尸祝陳籩俎就祠構層樓近江紀前矩邇來數百
年變遷感今古祠廢樓亦空延眺空凝佇江流自滔滔
野烟生柳浦

近江樓

小人肆權奸君子宜見棄心肅秉直節抗章無顧忌柄
鑿盍相入薰蕕不同器效公以厚終時止聊自遂濂洛

有傳心朱張固同志尊聞行所知學禁忍相避坐見玉
津園身首忽離異君子道光明史冊芳姓字止堂久頽
圯滄桑幾變置但過遺直坊故里深翹企

止堂

古人重立言不朽良在茲四徐高甲第不問官崇卑各
自富文業千載以爲期羅絡百家言纂著意無疲西園
有別墅結亭臨清池叢桂傳芳馥令德永昭垂俗士競
利祿剿說侈浮詞得意旋棄擲營產擁高貲忽隨草木
腐瓊瓊良可嗤

西園

碩人在槃澗獨寤有深心處士居盤谷塵外自長吟昔
者任子巖栖止古梅陰古梅大如屋愛玩日窺臨亦復
取盤義闢園寬且深憑虛構高閣覽勝出遙岑清風生

古木明月照幽林暗香忽浮動冰雪諧冲襟緬維使君
賢中歲早投簪林園久自毀亮節世所欽斯人今可作
爲理淶水琴

盤園

寄曾雲叔瑞筠山中

鴻翥

聶大繕

對門江水清繞屋松濤大有書數百卷有竹數千个之
子慧業人一榻分禪座名山事業深故紙期鑽破近聞
消寂寥佛書時親課又聞逢舊雨新詩互酬和自嗟頑
鈍根多病恒坎壈不知春去久閉門日高臥索居忽兩
載何以補吾過

開歲三日過城東池上草堂

釋祥安

開春盡日闕杖策騁幽步草堂得先春古梅開幾樹怪
石疊危峰層疊相蹲踞點綴出天然雲烟莽回互主人
敬愛客烹茗勤治具臨池豁軒牕幽鳥啼不住是日雨
初消雲淨天色曙促坐展清言靜中渺思慮流連澹忘
歸一笑山光暮

清江縣志卷之二十

藝文二

詩七言古

宋

懷歸操

劉敞

蟋蟀在堂歲云除今我不樂鬱以紆豈不懷歸畏簡書
蟋蟀在堂歲云逝今我不樂濡以滯豈不懷歸友朋畏

送劉貢甫判秦州

蘇軾

君不見阮嗣宗臧否不挂口休誇舌在齒牙牢是中惟
可飲醇酒讀書不用多作詩不須工海邊無事日日醉
夢魂不到蓬萊宮秋風昨夜入庭樹尊絲未老君先去

君先去幾時回劉郎應白髮桃花開未開

贈劉貢甫孔經父曾子開三舍人

紛紛榮悴何能久雲雨從來翻覆手
恍然一夢墮枕中却見三賢起江右
嗟君妙質皆瑚璉顧我虛名但箕斗
明朝冠蓋蔚相望共扈翠輦朝宣光
武皇已老白雲鄉
正與羣帝驂龍翔

龜石

孔武仲

平川洶洶經南國匹練橫拖半天碧
洪瀾巨浪之中央忽見頽嵬太古石
此石由來幾許時混元一氣初開闢
神功割破混沌胎劃落半空隨霹靂
非鼇非鼈不可辨有若神龜見踪跡
精光不待媧皇鍊渾朴豈從巨靈擘

我知神物本天性推移轉運非人力
當時大禹走天下驅至九江爲納錫
萬牛攢車載不動鐵軸崢嶸自堆積
秦皇鞭山移四海怒視不能移咫尺
至今獨立猶驚人地志山經不能測
千靈萬狀誰復知一片堅頑粗可滌
昂頭笑出翠濤中跼足橫蟠九泉脈
勁殼縱橫竇穴穿當心一搭莓苔黑
淵潛不見曳尾狀口爍猶驚負圖色
青髯剝落向何處秋草緩緩晨露滴
勁健曾支玉女牀爛斑似點乖龍額
漁翁未往先自駭靈著欲伏安可得
龜鼈縮首不敢迎蝦蟇巡行夜戰惕
歲冬大寒百蟲伏圍勁之勢無歛側
風磨霜鍊無日休髮鬢皴痕成兆坼
負才不免刳腸累、珍惟藉天公惜灼
以炎皇之火精

清江縣志 卷二十一
釁以少昊之金液神鑽鬼卜不見形陰陽造化無遺策
大哉龜者物之精歲久已化爲真形有時月黑無人夜
繞岸光芒倏自生下駭深潭蛟蜃窟上應中天元武星
萬象森森下相向來決吉凶真僞情姦狐妖鼠已破膽
山魘野魅見亦驚波神吞氣不敢喘四面長漪鋪席平
吾聞溪老記往歲半夜風雨來冥冥剗然曳轉大潭左
百里震驚如雷霆背憎摧折雖萬狀崔嵬孤高終自靈
吁哉天地至奇物何爲流落於江城銅馬猶聞標漢殿
神羊昔亦馴堯庭便當推置玉堂上古貌岌岌無欹傾
姦臣猾豎作狐媚見之頰面先吞聲凶荒水旱必可卜
倉卒變怪皆先明匈奴喪魄萬里外慄縮不敢窺天兵
龜乎龜乎用不用壯士與汝同死生

送吳叔舉主簿往清江受納秋苗 王庭珪

田頭作穀催入塲一半白者輸官倉廬江主簿喜懷檄
放船椎鼓開帆檣蕭灘老農公事畢夾道歡呼羅酒漿
笑言歸去喚妻子今年租米兩平量

題清江胡氏瞻忍堂

楊萬里

俗物茫茫柰我何兒女昵昵不用呵先生笑間有酒麼
醉來得句自長哦家風孝友春風軟牀無黃金且青簡
君不見多愁多惱張公藝枉却御前百餘字

清江道中橘園甚夥

范成大

芳林不斷清江曲倒影入江江水綠未論萬戶比封君

瓦屋人家衣食足暑風汎花蘭芷香秋日籬落明青黃
我舟來遲佳景盡但見碧樹愁春霜

清江曲

姚勉

夾岸桃花燕子飛一江春雨鱖魚肥絲綸百尺烟波濶
深夜鳴榔載月歸扁舟一葉橫沙嘴得魚爛醉春風裏
綠楊深處酒醒時江湖半落天如水萬頃滄江五月涼
一川錦繡藕花香綠簑青笠鳴疎雨老樹殘烟帶夕陽
野船烟火夜明滅一笛風清楚江濶無魚無酒且歸來
蓬裏蕭疎臥明月江南江北老天涯蕭蕭兩岸梧桐葉
漠漠平川蘆荻花萬里西風雙髮華柔櫓聲中山水綠
一萍買斷黃金屋沙邊鷗鳥莫相猜是非不到清江曲
荷葦折枯人未歸寒波霜落雁初飛人閑節物時時換
又折梅花下釣磯青山四面清歌發幾點沙鷗起天末
一任長年醉則休醒時獨釣寒江雪

題清江常宰道院詩

王炎

古人救民如赤子今人臨民用笞箠孰知官府本無事
獨恨庸人擾之爾臨邛有客腰銅章三年為吏先慈祥
老農共說長官好柔柘陰成民小康公庭閒暇雁鷺散
燕坐胡牀清晝長撥煩何自文書省治道由來貴清淨
底須柱下五千言洙泗六經無猛政

元

送皮昭德之官武林

何中

羨子才如渥洼馬萬騎嘶風俱在下霜蹏如電不足飛
天上良星愁鞵鞞如何不歸十二閑遠放江南沙草閒
一朝驅入東吳去去看錦繡舊江山故宮土花無點碧
流杯流水誰移得萬古乾坤萬古空英雄無淚可輕滴
回首一百六十年間將議論當籌邊諸公何恃恃江水
江水常容偷渡船璧月無情瓊樹老遺恨滿腔不能道
留連一曲後庭花待得楊堅何草草海門自闢潮自來
禮華樂葉誤寒灰東風漸搖隄畔柳臘雪欲挹湖邊梅
平生友伴經行處嗟子東行問徑路一官何用計崇卑
好聽吳儂詫新句嗟我與子如有緣相逢相別不期然
龍杖堪騎定相訪馬蹏花下酒如川

題五公寺壁畫古柏

來陀堆厖挺雙柏槎牙直上不可計尋尺元氣所融結
通身是骨力醜怪形狀古黯色作柱擎天等閔事世閔
萬木俱難敵柏根水流滔滔鼓舞風流吞日月歷年惟
有雙柏牢萬牛回首參天高看得孔明事業如鴻毛

題皮野逸亭

范 曄

方丈新亭隱叢篠下有長風蔭清沼杖閒白日漏遊絲
空外青烟送飛鳥人生百歲今半之更百千歲將奚爲
麻姑自是好風骨按行蓬島歸何時

題臨江同知問流民事蹟

揭傒斯

江北流民七十口三十餘年在江表朋兇結惡四百餘

清江縣志 卷二十一
白刃差差歷村保崩騰所向如投空白晝攫金都市中
頃由南昌入豐邑反賂守者爲先容長官坐堂寇入室
妻子莫逃况金帛豈無鄉民敢相敵長官一揮翻辟易
臨江貳守廉且武手縛其渠散其伍豈惟鄉民得安堵
鄰境聞之皆歌舞其渠在獄伍四歸大府上功民俗熙
乃知一念敬厥職萬事至難皆可爲人民社稷我所有
安得坐視如雞狗人有雞狗猶愛之民社豈在雞狗後
請君看取臨江守

題楊補之梅

劉詵

補之之梅不易作况乃藏自澹翁閣澹翁千載忠補之
一世雄元氣擘裂乾坤冬開卷灑然見二公孤山之月
羅浮風淡雲萬古吹不融黑埃黠慘翠羽失小窗滉漾
重湖東塵心蕭蕭淡若水臥看青天露如洗

清江引爲永真賦

王惲

秋江水清深幾竿漁郎放舟烟渚閔中流舉網紫鱗出
不祇博酒供盤餐借問漁翁樂何主泛宅浮家無定所
賣魚生怕近城門肯到紅塵汚人處蘆花兩岸晚潮平
憶著蓴鱸思徑去朝廷物色那可得澤畔行吟何自苦
滄浪水清濯我纓林婆酒熟容賒取人閒萬事一醉休
睡煞江南烟與雨覺來滿眼是青山獨速綠蓑還自舞
漁父樂真可與細寫焦桐入新譜揭來山城官事紛簿
書鳧吏對斜曛開圖空繪漁家趣我恨不若江頭人

送鄧朝陽歸赴分宜州杉市巡檢 傅若金

男兒生當遊八區焉能鬱鬱守坐隅往昔滯留湘中日
我兄翱翔天子都先皇崇文坐垂拱平明西閣千官擁
瓊島稱觴日月閱玉階奏賦星辰動後來執筆隨天官
纂述大典垂不刊書成入對紫微曙宴罷歸辭青鎖寒
兄今得官三釜足借乘邏騎南山麓我有家書欲寄將
柴門迴映清江曲

朝陽予同里天厯初至京師嘗因天壽節獻萬歲山
賦後以能書助修大典當得內郡校官借江西司警
之職近家故也南山在宜州境修水之上杉市宜屬
故及之

明

劉宗海爲余作清江春雨碧嶂秋嵐二圖賦此贈之

劉永之

劉君早年善山水得意往往圖樵漁西昌城西一相見
忽然贈我雙畫圖圖中似是清江曲春雨蒼茫汀樹綠
烟中彷彿辨飛帆水際依微見茅屋漁郎繫船江石上
一夜磯頭水新長孤村日暮烟火微渡口歸人暝猶往
碧嶂層巒翠轉奇嵐光秀色含朝暉風林落葉洒青壁
雲壑流泉生翠微我昔結廬此山裏每愛秋嵐淨如洗
經年奔走厭風塵偶看新圖心獨喜憑君添我小綸巾
明當歸掃山中雲它日君來一相訪松根爲子開柴門

題郡城歐陽氏草堂

梁寅

桃源或藏朝市闕草堂那厭近江關門外馬若流星過
壺中人似洞仙閣異人曾見陶宏景訪客常交庾子山
書和藥塵香郁郁席沾花片繡斑斑斑斑花逐春風起
愛君詞章亦如此逸思朝凌閣岫霞清心夕比蛟潭水
白鹿蒼松詩近仙鉅澤名山畫爲史絕俗應同山島閼
結茅何必千巖裏巖裏烟雲如滿襟凡情日淺道自深
不向南山歌白石何須北斗並黃金春天遠羨壺尊樂
夜月徒搖旌旆心龍唇古琴懷古操爲君一寫澗泉音

吹簫行贈清江鄧孟中

劉秩

憶昔舟泊東蒼宿偶識髯翁朱海屋家藏故物彩鸞簫
曾奏當年供奉曲爛斑錯雜錦綺文篆刻金字今猶存
湘妃洒淚成血點彷彿猶帶蒼梧雲是時壯年二三友
斫鱸烹鮮勸行酒酒酣笑索海屋吹鸞鳳和鳴世稀有
歸來兩耳寂不聞攜書遊憩清江濱鄧君年少妙音律
開軒延我傾金尊尊前袖出篋管竹一聲吹裂崑山玉
坡仙赤壁興可追夜月秋衾夢堪續初疑松梢老鶴驚
稍訝花底嬌鶯鳴孤舟發婦不成睡長途遊子難爲情
嗟我聞之獨欣喜塵土襟懷忽如洗瑤臺蕭史去莫留
吳市伍員呼不起坐中客有胡菊莊風流老大諳宮商
珊瑚擊碎爲稱賞持箋索我哦詩章詩章未成歌已發
歌調簫聲共清越且須一飲三百盃莫待流光促華髮

鄧君喜有丰骨殊品弄喜與海屋俱會同舜韶合九奏
日供仙樂鳴天衢

霽月樓

解縉

夜夢乘槎度斗牛直到黃姑天柱頭嫦娥手把一輪鏡
邀我廣寒宮裏遊廣寒之宮九霄上玉宇瓊樓屹相向
白羽翠烟紫霧籠蛟龍盛住黃金榜天孫裁衣雲錦香
玉女織綺成文章左招南極益遐算右攀北斗傾天漿
一枝古桂陰婆娑吳剛持斧休蹉跎千載寒蒼塞宇宙
八埏舉掉逢山河是時白帝行秋令天與初秋金氣應
金莖欲採露花宜銀漢無聲雲氣靜我起問嫦娥員缺
何太苦何不長教似玉盤一片團團照千古嫦娥笑我
何太癡世間萬事有盈虧不論春花何濃艷當時秋葉
還凋衰四時寒暑迭來往百歲光陰猶反掌顏回好學
隕青春彭祖千年亦黃壤問答未及竟銅壺催曉籌金
盤半欹倒忽向天西流金雞酬唱忽驚覺毛髮豎立寒
颼颼向來行樂皆如此身在清江霽月樓

贈傅子楫德安教授

金幼孜

京師仲冬月天氣寒栗冽客懷已無歡况與故交別先
君昔教臨江時我亦攜書侍講帷春風游泳泮池上惟
君與我最相知君心磊落懷奇寶自分青雲致身早一
從領薦上京華拜官得似儒官好蘄州振鐸經幾年廣
海旋聞席再遷欒城契濶三載餘又聞書考來朝天相

逢頓覺容髮改却羨當時好風采論心但喜別懷舒話
舊猶看故情藹只今南去沐榮恩盡道德安風俗淳朝
回相送情怱怱作詩聊以申殷勤征車軋軋金臺路落
日風沙渺烟樹人生聚散胡爾爲况乃相逢各遲莫君
行遠道勿蹉跎正值歲寒霜雪多德安早到如相憶莫
道衡陽無雁過

徐太守畫梅爲李奎御史題

習嘉言

八十一翁徐太守歸老清江十年久幽情隨意寫梅花
寫真獨出時人右郡中舊說楊補之太守天機尤絕奇
雪飛宮禁花初發春滿千枝仍萬枝千枝萬枝擁瓊樹
不比荒山零落處自然一種冰玉姿半點塵埃莫能污
文章政事柏府官誓與茲圖同歲寒吳中此去徧攬轡
風霜隨處宜相看

雲岫軒爲謝彥輯題

浮雲本無定飄飄逐風飛從龍既有托列岫終所依憶
昨從龍九霄上中天日月光相盪崇朝變化作甘霖豐
年屢慰生民望生民飽食安恬熙功成急退寧後期間
閻隨處被膏澤正是無心出岫時無心出岫渺何許閻
阜崢嶸乃其所翠連玉筍長往來錦屏萬疊橫天宇山
中之人清且閒開軒看雲還看山佳境觸目堪怡顏還
願雲行遍六合一雨三日蘓人閒

牛尾洲

龔挺霄

牛尾洲何志地也若樂府上之回破雲中之類是已吾臨曾氏有烈婦被寇死其地今憫而歌之因以名篇

牛尾洲渺何許昔時寂寞寒水濱今日聲稱在人耳曾家少婦白玉顏纖纖素手閨中閔胡然一死野草閱天風且霾日光蝕烏驚禽駭人辟易千金致寇良可惜羣兇按劍玉顏摧奴輩非獨利吾財珊瑚碎換不回洲邊黑氣黯難開死者有知生者哀乃知越江魂猶逐潮頭來牛尾洲江水嚙顏波已逝石不滅留與玉顏作穹碣

浣溪魏公臨江政 原十首采入三首

俗之媮兮早婚少聘俗之貧兮求富厭貧俗之謬兮徒以愛憎乖至情男家女室倫之常胡然中道生棘芒昔聞有韋固括矢事中傷亦有張延賞曾不識韋郎千秋百世義不避人閒何處無糟糠今之愚民乃如此忍背前盟心已死不道儒冠未可量赤眼徒能絢金紫我公用法兼用情揮金作証為玉成寶釵合股鏡再明啣公之德無死生 右正貧婚

烏犍有角身有皮能令陸甸翻作泥嗟哉百獸各自適生民粒食皆汝為而何寢皮截汝角解汝四肢炊作糜力盡告食尚哽咽况與暮夜封藩籬我公勅法有厲禁荷較滅耳終不移田家數載得滋息桃林競鼓春風頤嗚呼吾懼烏犍汝命薄安得我公長在時 右嚴牛禁

前年公來攝縣秩閱馬公庭長歎息古人數馬論國富
今人限馬論人數里胥養馬供指使甲乙盡隸馬牌子
丁夫猝來未成列輪番走替無休歇汗流浹背方解鞍
又聞呼遣迎新官幾疋羸蹄幾跛蹇鞭策不前氣欲折
誰知法網密如泉刻將馬價入官裏遂令流弊一至此
我公百爲思解焚率由舊章何足云嗚呼寬一分民受
賜一分 右寬馬役

陽湖莊熊鵬之妻龔氏元秀死烈於習家坊二十餘
年於茲矣予讀士林哀烈編凜凜有生氣憶粵寇弄
兵時郡城洶洶懼不守或恐賊至且宿兵城下欲燔
民居以待守相許之先大夫執不可曰賊宿而燔猶
足攻賊今何爲者因得不燬衆喜奮殺賊會兵巡廬
壁峰公提兵至遂蕩平之今先大夫不可作矣哀龔
之烈重有感焉乃題其卷歸之 蕭允儒

憶昔粵寇弄潢池湖東湖西無寧陴藉兵禦倭兵卽倭
跳跟數載民流離陽湖莊頭熊家婦避賊遇賊習坊口
姑嫜良人路相失抱子同殲死不朽吁嗟賊徒機械多
掠人求贖張網羅富家百餘貧數金男生可還女奈何
石龍城隔蕭江水相向驚惶保堞壘各騁智謀議長策
僉稱郊舍宜先燬守相諮籌先大夫先大夫言此失圖
曾入孤城捍巨盜浹旬堅壁盡成俘居人萬口權聲動
願持我挺厲我衆渡江前驅擊賊營無燔我廬增我慟

未幾盡掃么魔塵女死貞節男死貧死者相藉知者少
道傍觸目皆酸辛元秀儲英出鼎族中丞刺史家聲肅
弱齡暢曉列女編况復貞心自天淑亦越于歸在名門
名門大母節猶存競誇貞烈照貞節正氣高名千古敦
死恨不知知不表徒聞遠邇生悲悄謾將哀烈寄長謠
山石崩摧霜月皎當今聖人開明堂有微必闡幽必彰
忠臣義士生休采肯令巖穴不褒揚

芙蓉館

李日宣

清江城中山水幽結廬選勝當山陬名花茂樹夾修竹
浮丹曳翠搖清秋主人文章爛雲綺曾綰銅符宰百里
三年奏計署郎曹一日投簪輕敝屣歸來濬沼別芳叢
列沼更植千芙蓉插架已知綈帙富吟詩長對花事濃
山顛亭子宜舒嘯四面青峰入遙眺綠陰滿徑晝長閑
始識靜者心多妙我來訪舊感高蹤家園亦有幾樹松
膏車秣馬衝塵出樂境何如堅白翁

五勸歌

秦鏞

嗟我四民農最苦况復沙洲兼瘠土去年倒瀉三江水
今年滿浸百日雨相看田裏稻葉黃家家惟有塵生釜
那堪差吏夜驚呼舊逋新餉急如火羹湯麥飯猶不飽
豈有金錢應官府老父呼兒行慎勿徒悲傷春有茶芽
綠冬有柑子黃婦人典衣男鬻產入城且納官錢糧方
今樞府募戰士飽食日日眠沙場我輩猶處太平日敢

逋國課愁君王但願官長念我苦世世子孫終不忘 右
勸勤國課

一聲雷響水便滿三夜月明又苦旱既水復旱苦多般
何不躊躇操勝算我有官塘數尺深急時莫阻東西隣
春雨一注水平口秋日時聞桔槔頻勿將水利併豪右
田禾槁死將誰救一朝乾沒爲腴田瘠人肥已任爭鬪
云胡不念禾與稻貪夫漫道蓄魚好蓄魚僅充一箸甘
蓄水可供一歲飽勸君勿蓄塘中魚蓄魚相爭水利無
但得官塘處處滿不須更繪流離圖 右勸公水利

貧者流離非得已富者何爲復行賈爲官尚欲辭斗粟
作客何心棄鄉土辭家轉盼七八年出門展轉數千里
不惜家園久離別那堪道途多梗阻陸行旣怕豺虎儔
水深又恐蛟龍得一朝疾病兼死亡十萬腰纏亦何益
吁嗟乎上有高堂白髮垂下有閨中少婦朱顏開稚子
成行未識面勸君束裝歸去來 右勸務本業

昨夜東隣驚放火今夕西隣又盜牛只緣隣里不相救
使我良民夜夜愁保甲之法自昔賢十家十甲相鈎連
一家有警百家救藩籬不許外人穿弔死扶傷要和睦
同宗一姓尤宜篤莫教奸宄竄其中非我族類便驅逐
戌夜時聞柳與籬防身亦帶弓與箭不煩官長相督責
保爾身家爲最便此法不愁盜與窩夜戶不閉樂如何
今日中原漸多事勸君聽我保甲歌 右勸行保甲

二月已空瓶裏粟四月穀盡家家哭一朝穀賤不值錢
賣與商人舟百斛貧民智短宜苦饑不將前後總尋思
何如藏將半閤稻留到明年穀盡時積穀不論升與斗
聚囤成倉供百口但須社長廉且公此法行之可長久
豐年預積饑年穀饑年穀比豐年玉年年豐稔穀倍增
推陳易新利相續更有迂談亦要言販豎蠅頭利甚纖
水火不侵兼却盜民閔宜用五銖錢

右勸立社倉

國朝

蕭江再泛

李明睿

濛濛雨氣遊人醉江上春風生百媚瞳瞳日影照巖谷
江闊波浪如銀屋總爲遊人探瑰異金鳳迴龍慧力寺
蒼蒼暝色歸舟緩江干燈火紛凌亂城郭山林分兩岸
橘柚人烟多無算老子無心遊汗漫

就亭歌

青山踴躍無朝暮每待高人竒始吐邱壑雲烟有幾人
勝事關情難兩遇使君自是超然者探幽抉秘無遺趣
蓬壺只在几席邊世人那得知其故天生異境不能藏
今日逢君如手付偶因高阜便支筇卓亭要使江山聚
青玉案前仙吏署芙蓉屋下生烟霧問君結想何能爾
人力神工皆不露快閣登樓亦未竒竹樓結構安能附
有江如帶山如屏春風日日亭中駐山光奮迅逐人來
江聲疾走如飛兔中有詩人謝宣城酒酣自把驚人句

豪舉偏同太白爭風流只恐蘇公如文章山水無窮時
千載應爲亭子護憶昔同遊使君江老夫興發爲公賦

只今遠望若天涯想像就亭空戀慕

使君江公自註云癸卯之春使君邀

泛清江余同諸詞人傲昔郎官湖及僕射陂勝事酌酒於江中號曰使君江

柑林行同諸公作

施閏章

蕭江水抱山城流奇樹青青金鳳洲我逢好友卽開愁
渡江埜坐隨沙鷗沈沈翠幙暗天地離離萍實堆林邱
黃衣仙人好顏色笑我多憂將白頭鹿皮藉草傾清醕
揮杯急勸如風雨洲上木奴那作計橘中棋局今何許
酒罷烟寒香在衣邨醪重酌莫相違千秋不忘此今夕
明月隨舟送客歸

紫芝歌

臨江府城南有唐處士歐陽董讀書臺叢生瑞竹
色爛如銀名瑞筠山予分守之三年忽產紫芝百
餘本李宗伯明睿更名紫芝山爲之記

歲之癸卯夏初吉石龍城南紫芝出爛纒參差數十叢
紛如紫雲曜赤日寺後亭陰半山滿盤椀車蓋狀非一
百年父老驚罕見十日窮慘猶未畢是時僧舍薔薇開
藥公駐錫閩翁來拄杖披榛睹靈物賦詩大笑同徘徊
更錫名山曰紫芝摘詞勒碣冠崔嵬此山舊爲處士宅
中林尚想讀書臺昔產瑞筠今神草寸壤作異胡爲哉
九莖連葉非難致甘泉涵德空矜異嘉禾不書萇楚嗟

忍拾山茵侈奇瑞陳顧周梅陳士業顧赤方周宿來梅耦長皆有詩皆健

手後先作歌真好事我愛紫芝曲人呼紫芝山白石青

山無姓字江雲松月心長閒老夫齒落鬢已斑胡爲澳

忍局曲風塵閱五芝倘許斧子食會當餐英茹實使我

光澤成朱顏

臨江太守行

美高使君也名培蕪州人

臨江江水見江底太守酌之甘如醴臨江野田半荆棘

太守見之淚沾臆露冕東郊騎瘦馬牛背牧兒不肯下

官齋種藥兼種蔬厨中但有武昌魚

神船詞

清江縣舊俗上元昇彩舟行地上羅載百神服飾

甚盛鼓吹三日夜乃送而焚之江滸

清江江水春未生江城滿耳棹歌聲驚雷駭電紛縱橫

桂楫蘭舟平地行駕赤螭兮吹玉笛驅風伯兮抗霓旌

船中恍惚天帝居乃是上帝百神之所都羽衛陰森彩

仗集帆檣蜿蜒蛟龍趨別有天妃曳長佩篙工柁師皆

好姝靈旗風起時晦暝仙樂要眇還有無疎星厯厯月

皎皎夜祀明燈接清曉騰鳧孺鱉陳酒漿瓦卜雞占前

致禱黃冠陪坐恣盤飧父老爭言神醉飽願驅厲鬼屢

豐年使我百穀皆堅好喧闐花月可憐春送神還向清

江濱縱火燒船付江水錦袍絳節成飛塵塵飛處水東

去梅花已落江臯路年年賽社不愁貧典衣又辦蕪田

賦

愚樓歌示舍姪

施 譽

荒衙僻在城一隅門前十步才旋車公餘退食如穴居
橫琴礙路牀積書拓求隙地徒區區單題短桷軒四衢
俯檻獨立何足娛而乃爲此能無愚使君自謝拙且迂
拊臆欲訴先嗟吁榛蕪千里兵燹餘哀鴻未集邨市虛
驚魂常斷夜嗚烏攬衣起坐空躊躇涼風吹月墮山孤
怕聞野哭增憂虞炊烟漸密刁斗疎庶幾雞犬歸其廬
山田新闢成菑畚蕭江白水甘醞醜四知臺一杯亭傳
之百世爲楷模愚樓乎愚樓乎他人過愚樓下還記
樓中觀察無

賣船行爲施愚山作

程可則

湖西使君清無比一官但飲湖西水湖西之水清粼粼
照見使君亦如此使君初到湖西時千里百里紛瘡痍
使君惠養隨取致調和三郡無嗟咨幾年教訓兼生聚
只有官貧尚如故政成不賸買山錢日歸且賣扁舟去
君不見世人作吏脫邊幅衣馬輕裘及僮僕管取千航
捆載歸那知一路吞聲哭歸來治湖還治山山水全移
几案闕藏春屋傍芙蓉鴨載酒人過楊柳灣轉眼桑田
不相假荒臺絕磴哀湍瀉父老徒傳墨吏名子孫半是
鶉衣者羨君官貧百不憂愛君身閒能遠遊要使歡聲
滿江楚賣船豈得非良謀卽今一葉亦快意與汝散髮

仍滄洲

樟樹鎮

李 紱

機槍夜指旄頭落老鼻鴟張妖禍作文成旌節下劔江
一夜迴舟吉安郭飛馳羽檄陳師期多方誤賊賊不知
指揮吉贛會饒廣盡驅守令爲偏裨舟師蠡集到樟樹
舊是仙人射鹿處臨江醜酒椎牛羊大誓淋漓犀虎怒
前軍先破灌嬰城貔貙失穴神已驚順流一戰驕藩縛
淨洗日月江流清當時功最伍文定同心更有鄉先正
帷中東廊贊軍謀蕭庾雷濟皆機警江彬誘駕忽南來
威武將軍誠可咤却捕元功入罪罟蕭雷竄匿雄心灰
中官橫議已如此不待傾危怨張桂文襄亦是濟時材

底事彈文失公是靈風颯颯大江濱豫章陰森如有神
國家緩急見經濟乃公莫溺儒生巾

土橋隄歌

張景蒼

袁顛北流滙臨陽沿江窪下皆水鄉百年老隄久衝決
春流一望成汪洋沃田淹沒萬餘畝黃沙一片別無有
居民年年苦瞻荒空向長隄補缺口前人曾築隄隄成
不善後聞說日亦費斗金徒博虛名難垂久遼陽白公
撫豫章民瘼寢食未嘗忘下車之始首建此指揮籌畫
何周詳翼贊更有賢太守不避風雨勞先受一日督率
萬千人能使人人不停手五里長十丈厚打千椿堆萬
篾猶恐有司失堅牢沿江更植萬株柳中丞建此良匪

易利濟千秋斯不朽從今此地樂時康田禾收穫成倉
箱不願爾民之碑頌功德但願爾民飽食早完糧

范母簡氏旌節詩

裴玉麟

氏年十七初結褵病姑牀上呼湯糜詎論新婦三日後
便糝糝鹽醪飯五年姑沒貧莫葬榻榭在堂日相向
春汲晝操夜辟繡貿布得錢封高壙阿夫風木多所傷
臯魚一段赤子腸眼枯淚血嘔心血歎忽一疾成膏肓
彼蒼毒手何爲爾數月偏令阿夫死夫死便欲不獨生
回顧伶仃幼穉子殉夫撫子難兩完自不爲易爲其難
呱呱遺腹復墮地青年嫠婦持家寒逼嫁誰人強執令
閨中決烈由天性白虹繞頸驚比隣茫茫恨海苦難竟
可憐蘆荻灰中畫十指餘錢買書籍伊唔寒暑課孤燈
欲臥未臥東方白書田有穫酬苦耕仲子弱冠爲諸生
試看嶙峋高綽楔誰云苦節不可貞

快哉行清江揚帆作

桑調元

開船日出清江口衝波浩浩江風吼不見烏篷映天飛
但覺蒼山夾岸走昨者江行十日來鄱陽湖面天光開
漁舟點點蕩烟波高歌曉和鴻聲哀路入章江棹沙水
落日霞明一匹綺乘風破浪杳莫期買魚沽酒淹沙市
今朝十幅蒲帆張船頭滿聲擺雷碾浦瀨空濶波滂洋
捐歛撇漩水手強去若箭疾神洋洋扶起百尺驚鷺鴛
一縱瞬息可千里便欲立抵新喻疆竹坡斫取九節杖

醴泉酌飲三危漿風狂浪洶帆不正船舷半仄風力橫
砉然轉篷帖波起奔飛快意輕性命有客失聲口嗟呀
竦睨危樯憂恹恹老夫宴坐心魂定飽經險阻夫何病
下碇翻憐白日昏題詩敢倚筆鋒硬

化梭亭

王泰性

陶公勲名星漢垂運甓雄圖吾所師更聞當年化梭事
毋乃荒唐使我疑自古英雄不得志一竿澤畔非無意
直釣金盃不釣魚許大經綸聊小試曾聞雙劍躍延津
破浪翻波自有神一梭繡澁何足道誰信飛騰具甲鱗
寒芒徹水埋塵久掛壁夜聞風雨吼百靈呵護忽無蹤
神物豈爲人世有是知人奇事亦奇齊諧所載皆管窺

夢入天門折左翼猶疑公也一蛟螭泥塗伏首真骯髒
吾徒落落知誰向天池騰化豈無期化梭亭畔生惆悵

春日遊慧力寺有懷施愚山先生 李昌昱

臨江地僻民不欺訟庭無人青草肥一犁夜來新雨足
勸農使者城南嬉城南古寺有慧力昔傳高唱施監司
荒山芝草忽秀茁百年所見其人稀

寺長紫芝數百本
人以爲監司之瑞

時維兵革未休息鞭笞賦斂愁蒸黎先生歌詠雜涕淚
此心可證佛慈悲文章政事兩寂寞松楸竹柏還因依

我來晚出愧前哲空然懷古生嗟咨高青亭在見遺躅

摩挲鶴去留殘碑錢劉同行二秀士

錢時雍
劉隄琬更指閣阜

青青垂詩人揆奇徧登歷山靈恍惚如相思吾儕有興

次第往茲遊發軔須記之

清江黃氏孝烈歌

咏黃思彰及其家揚傳二烈事

翁方綱

清江劍江綠沄沄積爲正氣騰清芬婦姑同時誓赴水
蕭灘萬古橫白雲匹布纏身勝華袞楊傅雙烈留貞珉
四海皆傳黃孝子布囊血裏襦猶新篝燈剗臂事非易
到今聞者皆霑巾孝烈一門映先後深根大澤培松筠
後賢繼起感忠孝天之報施蓋有因紅萍橋下暮濤湧
青山宰木留千春

送楊二溪比部請養歸里

學光

嚴 烺

慈烏啞啞鳴朝暉得食反哺心依依有客司憲食

天粟明發不寐眷重關重幃壽康多老福綠鬢當筵健耳目

門外春開及第花庭前日報平安竹楊君奕世清白傳
甲科繼武當華年昔時綰綬絲竹縣今日簪筆白雲邊
白雲亭上望親舍千里清江舊桑柘一飯一想含飴時
兩年扇枕違清夏小人有母母有姑陳情俯伏向天衢
帝曰俞哉汝往養銜

恩臣與先臣俱稽首而退戒行李佩劔裝書僮僕喜青驄馬
傍碧油車遠勝鮑宣歸鄉里歸去華堂雙奉觴報劔此
後日方長孫枝自獻斑斕舞鯉舍時供黍稷香十載功
名慙驥附宣武坊前對房住送君我爲譜南陔厥草油
油望行路

詩五言律

唐

乙丑歲九月在蕭灘鎮駐泊兩月忽得商馬楊迢員外書賀余復除戎曹依舊承旨還緘後因書四十字

韓偓

旅寓在江郊秋風正寂寥紫泥虛罷獎白髮已漁樵事往淒涼在時危志氣銷若為將朽質猶擬杖於朝

宋

獨酌憶和甫

劉敞

開窗一尊酒獨酌靜無言夕陽不可駐流水直東奔野犬迎虛吠舟人爭渡喧悵然此時意不醉已消魂

曬書

藏書不滿百幽蠹及時除上有朝廷副多從秦漢餘烟山迷禹穴雲海隔崑墟持此貽清白歸為林下居

又

劉攽

幽事隨時有移書曬日華囊開魚蠹字眼暈石榴花志病多三事勞心愧五車賜書仍有品前輩羨吾家

送臨江軍監酒李太傅

梅堯臣

三江卑濕地北客宦遊稀霧氣多成雨雲蒸易損衣白醪燒甕美黃雀下田肥未辨殊方語山歌半是非

至樟樹店寄徐安道

孔武仲

逼仄東南路連天紫翠峰微雲還掩日小雨正催農谷鳥投枝急山花落澗濃意巖今不遠談笑喜相逢

臨江

劉 昇

居然兩福地首尾限清江
窳窳蘆洲抱晶瑩石澗淙
潑雲和穉榘割雨曉舲艘
愁絕村南舍馴雞對小窻

清江道中見梅

朱 子

今日清江路寒梅第一枝
不愁風嫋嫋正奈雪垂垂
煖熱惟須酒平章却要詩
他年千里夢誰與寄相思

送劉子和教授赴贛州

周必大

籍甚詩書帥中和正爾歌
人留河內寇帝念禁中頗
餘事褻丁志多聞重乙科
因無官長罵解使客羶冬

上慧力寺

鄒登龍

今代空王宅前朝處士家
牛車爲象藏鹿苑發龍華
松密風生樹江空月在沙
闍黎飯鐘後邀我試新茶

江居

獨作幽居計江邊屋數間
水流天自在心遠地寬閑
鉏月栽梅樹移雲疊石山
白鷗盟欲結倚杖看潺湲

送宋謙父之清江因簡希亮

張至龍

吟詩夕陽裏相送上蕭灘
前路逢梅處同誰倚棹看
歲窮風力緊江濶雁聲寒
持此呈蘇李人生識面難

臨江

文天祥

江岸人多鬻城居昔屢焚
市人半僮父豎子亦將軍
蛟哭金甌雨後啼玉觀雲
周郎墳上土回首淚成痕

元

題吳生雨吟圖還寄清江皮野

范梈

江雨四時昏故人家遠邨如何一見面還又兩忘言老
樹經鮫淚空花斷雁魂由來前日畫妙手出吳門

輓文遜志學士

劉詵

聲名天下士人物玉堂風坐失杜羔孝真成嵇紹忠壽
無人世半論有後來公今古元如此江流日日東

聞臨江范德機以母喪哀毀而卒 柳貫

才名朝士右行義古人中正想招旌起何嗟掩袂窮山
川還寂寞臺閣謾穹崇此世丹青筆吾今屬望空
服斬誰非子摧形不有身使能穿壙入果勝闕泉親架
兀留文塚淒涼捲釣緡夜臺開幙府還借筆如神

和贈陳與之

傅若金

午日清江道南風滿白蘋暮年爲客健長路對人貧憶
弟餘雙鬢還家稱一身有孫堪慰眼莫厭把杯頻

賦德機荆南精舍圖

倪瓚

結廬溪水南勝事足幽探夏果落山雨春衣染夕嵐石
欹招鶴磴門俛射蛟潭日日榮歸夢蕭條雪滿簪
明

春日宴胡助教寓館次傅商翁韻 劉永之

高館向山開相將海燕來蘭肴升玉俎椒醕瀉銀杯雨
竹藏幽鳥風花點綠苔傷春無限意偏向豫章臺

雲林清隱爲空碧上人賦

瑩公栖遯處珍木自成林藹藹碧雲合紛紛蘿薜陰焚
香對石几長嘯撫孤琴余亦厭塵俗將返閤山岑

和楊伯謙韻

酌酒長松下垂蘿拂酒盃異禽窺藥鼎乳鹿臥書臺澗
水穿林去山雲帶雨回相期同結屋不厭野人來

和胡叅謀書懷韻簡彭書記

色重東橋柳香傳北嶼花虛舟侵鳳渚春水入漁家野
燒迷朝燧江城帶暮茄故人居幕府多病嬾趨衙
青年杜書記白髮漢郎官曉佩聯清響春衫奈薄寒詞
賦哀時切詩書易俗難頗聞邊報早聊足慰辛酸

清江釣隱

陳謨

小隱清江上無心競白鷗蓼雲團竹屋蘆雪點羊裘放
鶴歸何晚看花醉卽休底須終日苦三百六魚鉤

過臨江訪彭聲之

王沂

金鳳洲邊路維舟重憶君江虛秋氣入沙淨曙光分斷
雁前汀起鳴鐘隔岸聞因過鑑池上詩思亂愁雲

題清碧書舍

金幼孜

愛子讀書處幽懷孰與同青山當戶牖綠樹隱簾櫳濯
足過秋渚鳴琴坐澗松故居回首日總在畫圖中

宿天寧寺

夏寅

秋暑倦行日聊歌對碧山我觀名利好僧入退居閒字
剝碑年號香驚佛面顏晨隨業風動鐘磬隔人間

長春軒爲清江劉先生題

羅玘

竹密年年筍林多日日花天應憐老景春且住貧家鄒
氏律吹谷建溪鼓喊茶終須窺造化不似此生涯

江行寄朝望

嚴嵩

挂席愛蒼茫江天足晚涼望移城塔遠歌入浦雲長起
鶴橫烟嶼飛鷗趲野航勞君致美酒蓬裏自銜觴
萬鹿園總戎臥病臨江邀晤天寧寺

羅洪先

不矜萬戶貴但愛五千文身病人誰問鐘殘性自聞慣
邀鹿苑士厭對虎符君底事頻推轂憐君重報勲

永市

曉燒色何赤愁如烽火燃幾人家尚在百里信難傳夕
鳥孤飛處秋山斷影邊櫓槍何日掃不敢問遙天

夜發蕭灘

徐問

驛小臨官道沙長帶水程山於雲處沒星過渡邊明瑣
瑣非初意營營慨此生北堂凝望遠秋日萬重情

人日飲敖水部卽事

邊貢

結榜依江岸傳觴感歲華偶同人日酒翻滯使君槎水
凍仍餘雪林寒且未花醉歸燒短燭高枕聽昏鴉

柬新守徐養齋

簡霄

鄉國幾年別傷心滿眼愁自憐非樂土何幸得新侯時
事驚談虎民風問買牛憑誰謝琴鶴期日爲淹留

夜渡清江

李先芳

聞櫓那能睡，倒衣時扣舷。
蠱聲悲野草，漁網集潭烟。
江漲晚來急，月明秋可憐。
一爲山縣吏，夜夜帶星還。

澄心亭

管大勳

高齋臨碧澗，清境滌煩襟。
萬象原無障，纖塵淨不侵。
月明空鑑色，波靜見蓮心。
自入淮陽臥，常懷川上吟。

雷祠齋禱

符錫

春雷何震迅，夏雨竟稀微。
農望爾方切，齋心誰得違。
郊原回甲坼，滂沛掃炎晞。
預卜豐年兆，歌聲達遠畿。

宿石城庵

熊化

夜半疎鐘斷，鳴泉度石關。
雲霞深象外，烟火隔人閒。
夢

入松風穩，神隨蘿月閒。
靜林驚落葉，知是鶴飛還。

送盧本潛明府入覲

雙履瞻天近，孤琴別路悠。
泰符惟極北，姑射自城頭。
梧竹燕臺曉，芷蕙楚峴秋。
但留瀟浦月，千載映清流。

朝天宮

錢應華

丹臺倚城曲，玉篆降雲中。
闢地經年久，朝天有路通。
青鸞低繞坐，白鶴遠凌空。
吾已謝塵服，黃冠學御風。

甲戌九月之金陵舟次蕭灘

萬發祥

沙際月爲白，洲前浪轉輕。
坐沈紅燭案，看到石龍城。
鏡吹雄江路，山鐘澹客情。
家人此良夕，應共計舟程。

國朝

送施愚山先生分憲湖西

曹溶

南顧宵衣切清江勅建牙城連三楚岫旌拂五溪花遠
馭青騮壯離歌綵鷁斜寸心知已在不復望天涯
朱旂青雀舫送子客途中近地寬相憶新除喜至公渡
湖飄岳雪開署接江楓自續西征賦心輕武定功

奉送施愚山先生入賀還湖西

王崇簡

素交合有幾相見又分襟別我數行淚知君千古心馬
嘶寒照去人倚小樓深迢遞關山夢遥遥何處尋

宿慧力寺

胡學浹

雨餘江漲起水抱一城流雙屨新泥滑孤筇夕照留雲
晴星欲晝春靜夜疑秋妮妮同鄉話那知作客遊

雲山人山房

施閏章

逕轉疑無地山房斷杳冥近江花砌冷倚樹蘚墻青林
挂飛來錫牕存自寫經滄洲有明月先到爾階庭

石谿寺

青林藏石磴紺宇逼城隈松雨連山響江雲入寺來烟
迷題字碣草沒讀書臺客到空懷古庭花歲歲開

曲水舖

一望平蕪綠千巖霽色遙園茶初吐葉驛柳未成條駐
馬尋山寺啼鶯過野橋年年流水畔春色爲誰消

閣阜山同沈治先用考亭韻

東風碧樹林秋色晝常陰獨鶴松杉靜荒壇歲月深井

留丹竈藥山見白雲心千載尋仙蹟悠悠直到今

中秋日同集慧力寺中雲根亭

樹裏城樓出亭邊江水流吾儕各詞賦佳節共淹留日
晚雲霞合風香橘柚秋他年存勝跡倘似峴山遊

中洲精舍王臨江攜酒

孤洲山郭外隔水自僧家霜柏初紅葉秋茶正著花江
空清鼓吹野澗就雲沙興極回舟處前林已暮鴉

喜晤施愚山先生於臨江

周茂源

已是十年別相逢倍黯然落花離海嶠鳴雨到江天萬
國兵戈後茲方吏隱偏回思朋舊在白雪幾人傳

遊慧力寺

笄重光

松巖蒼翠合雲徑老僧家石澗餘春雨遊人趁落花叩
門驚宿鳥洗足踏新芽坐看江天豁山童爲煮茶

中秋小雨飲就亭

吳懋謙

小飲不辭醉中秋奈雨何清暉沈浩渺繁吹沒星河髮
白吾衰早詩才爾最多故園有叢桂遙望隔烟波

望閣阜山

徐崇倫

極目江城外茲山獨屹然簷前懸翠嶂樹杪見晴烟色
阜偏宜雨峰高欲接天登臨曾有約攬勝在何年

登就亭二首

王愈擴

游觀在簡易就地立孤亭野色城頭合江聲座上聽清
尊遲夜月遠火帶春星日日疎烟裏芳洲橘柚青

每下蕭江棹深懷接坐歡風聲常在竹草色半侵闌官
冷詩篇富民閒樂事寬江雲無定影醉裏幾回看

登就亭

王嗣槐

官舍臨江寺鐘聲入夢閑仙遊原福地吏隱卽名山溪
漲鷓鴣近霜濃橘柚斑頻來花下飲堅坐未能還

前題

郭林

孤亭官舍裏捲幔卽江津兩岸寒烟樹千家細雨春羈
懷驚物候延賞及花辰笑詠南山句悠然見古人

過就亭

周令樹

小築芙蓉屋悠然入就亭雲來三徑濕鶴度一林青山
影城邊出江聲枕上聽所嗟人萬里不忍說揚舲

封溪蕭侯廟

朱彝尊

返照封溪上停橈思惘然地傳白鹿渚人記赤烏年簫
鼓迎神曲帆檣送客船誰令戎馬日萬里入南天

觀瀾書院

熊士珂

誰橐鯨宮甲招徠等七旬功從儒者出道以覺斯真勃
宰風生座繽紛花落茵觀瀾洵有術濂洛一源親

首夏過臨江謁陳擎石太守因與楊商珍諸子集觀

瀾書院喜賦

余達行

盛夏江猶漲帆停草閣幽簾疎飛化雨檻曲俯澄流沂
水傳春詠滄浪聽晚謳層瀾憑注目相與瀕源頭
梵唄祇林近書筵翠幄遮涼風吹鄭草細雨拂江花義

合人千里師尊道一家依依游息地長此對清華

樟樹鎮

潘耒

水市章江岸由來藥物賒珍叢來百粵異產集三巴鮑
靚應頻過韓康或此家何須乞句漏卽此問丹砂

過臨江聞同年黎瀟雲已亡居村不獲弔唁詩以悼
之

同籍推君老懸車有歲年猶希雲出岫竟作劍淪泉貧
豈因官減清當以品傳歸田多著述誰與輯殘編

春日維舟樟樹鎮過長生庵

王泰姓

春從江畔覓花對寺門開老衲依雲臥何人看竹來繞寺

多竹閣吟詩有骨靜悟佛無胎還自扁舟去前山暝色催

清明雨後遊慧力寺

牛元弼

陰雨連朝蔽清明喜見天來遊慧力寺散步大江邊日
影移禪座風波送客船勞勞何爲者幾欲息塵緣

重構吸川亭落成

施廷元

勝概何年闢荒亭此更修江波飛素練樹影瀉清秋過
雨花低檻如雲稻滿邱官齋吏事減望眼正悠悠

辛未送清江王明府卽次留別韻

錢順則

十載勤民意千年定遠謨室家懷樂利郊野絕追呼歲
俸清頽士春蔬綠滿厨永維慈母惠比戶淚沾襦

吸川亭和施三尊韻

譚良佐

高齋延勝賞琴鶴對清修吏散花侵幌亭虛氣暮秋詩

追唐大厯客少宋齊邱許厠談諸末何曾斥繆悠

范節母詩 四首錄二

楊有侗

領血堅如石留傳奕世新敢因危語逼輕玷少年身烈
行驚鄰婦貞心質古人高風誰繼者感我淚沾巾
憂患供姑日劬勞課子時芳名千載羨素節一燈知日
月光同老冰霜志不移允堪風末俗綽楔著貞規

宿施愚山湖西道舊署

張景蒼

聞道湖西署當年詩酒場愛交天下士吟對月中觴春
雨苔階潤秋暉竹徑涼荒亭閱眺望山色遠蒼蒼

與楊畹蘭叙別二首

張天棟

難將今夜酒盡話昔年心浪湧長河柅霜清壯士襟海

鵬驚北運別雁作南音勿念馳驅苦蒼生待作霖
許多離別緒半在道塗閱峻阪君驅轡空庭我閉關去
留悲萬里肝膽越千山勉樹古人業毋爲遊子顏

慧力寺贈宏慧上人

聶應衡

偶與高僧晤清談妙入微逢人多道氣卽境有真機竹
影頻移座花香暗襲衣行雲臨別意徒倚惜殘暉

幽暢亭

彭廷簡

古刹尋幽暢蒼陰一徑濃穿林交野竹接檻引寒松水
瀉澄清色山開翠黛容悠然消萬慮茗椀坐聞鐘
立秋後二日停棹金鳳洲取徑過慧力寺題壁

德隆

艤舟隨所適尋勝到香林不解空王義寧知靜者心火
蓮雙蒂艷寺內池蓮有並蒂千瓣者獨佳法雨一潭深茗椀消殘暑秋
蟬竹外吟

閏二月八日邀同董曲江太史及諸賓友遊城南慧
力寺 八首錄四

新晴騁遊目蘭若近城南置閨春才暖尋幽路早諳隔
江開曉霧梯閣坐烟嵐到此囂塵遠澄懷印碧潭寺內有池

甚清 幾樹元都種維摩一室香院後絳桃始華化城留色相古佛闌

滄桑山僻春能到簾垂晝漸長前朝遺勅在寶墨更焜
煌僧出明正統間頌賜藏經勅書紙墨猶新

高青亭子上佳句勒愚山接檻飛颿過爭林倦鳥還儘

堪窮物性猶足解塵顏積翠橫千嶂蒼蒼落照闕
徑竹何瀟洒江霞自卷舒多君遊興洽而我宦情舒敢

擬參熊軾常思駕鹿車逃禪空有句未許契真如客頁與王壽峯郡曹遊此予有句云醉後拈花空解笑興來結社欲逃禪

過東林寺 汪志仁

小橋通石徑風雨一經過身世勞如此平生志若何山
深紅葉早寺古白雲多偶共閑僧語寒烟暝薜蘿

臨江道中 徐曰都

問俗亦素志來停遊子軒村童立牛背田婦抱雞孫牽
纜到灘急趨墟當午喧古風此猶近為政第除煩

遊紫芝山慧力寺

潘汝誠

背郭南唐寺支筇躡級登攢青岡蜿蜒插綠竹稜層初
地無塵劫傳衣有廢興山田能作苦林訝啞羊僧

勝蹟銷沈半留題作者誰馱經珍賜勅瘞鶴剔遺碑

寺有

明正統十年經藏賜勅施恩山觀察瘞鶴銘碑滿月仍金相香風到淨池茶瓜
解供客合賦已公詩

樟樹鎮爲王文成誓師處

趙翼

藩邸猝稱亂文臣此誓師倉皇臨大變智勇出良知烏
合乘城日狐疑返旆時從容樵舍縛儒者事原奇

送姪懋珩之越

楊有涵

五兩帆無恙飄然指故鄉蓴羹千里豉楓葉半林霜邱

壑吾將老烟霞興未忘謝家羣從好會見賭香囊

南溟曾奮翮東觀已蜚聲錦製吳江麗詩傳粵嶺清徹

廬眠食穩空橐往來輕婚嫁何時畢遨遊學向平

極浦明斜照溪流燕尾分衆鴉爭老樹一雁入寒雲斗

酒聊相慰秋聲不可聞牽船還著岸萍梗思紛紛

與我周旋久挑燈佐苦吟家聲前夜雨手澤百年心笛

爲山陽吹碑思峴首沉西洽延竚久愁絕是知音

此去嚴陵瀨空江一釣亭鷺拳秋港白天壓午潮青山

色筠籃遠湖光蠟屐停從來于越地正有少微星

頗覺還家暫而今會面難亂山鄉夢短永夜角聲殘瘦

骨依屏立衰容照水寒他年煩問訊更取畫圖看

過赤城觀

何曰蕃

此地會留榻睽離又七年堵牆崩宿雨竹樹老寒烟樵
牧聊安俗林泉笑學仙道人猶話舊未便絕塵緣

五言長律

宋

北軒手種竹兩竿近輒有甘露降其上作示同舍

劉敞

秋來手種竹憔悴不成林從此雪霜晚空驚孤直心如
何沾瑞露似欲慰窮陰珠華燦將墮玉色潤還深含春
作荏苒戴日尚蕭森元澤非人力樵蘇無見侵

元

黃體元別業因梁爲亭范德機榜玉壺冰揭頤曼賦

古律余賦今律十韻

何中

何處來奇璞雕鏤締構工置之孤嶼外渺在十洲中石
色搖晴雪林輝貫夜虹貪寒龍伯到愛潔鶴仙同拂席
柳陰綠繙書花影紅盃增瑪瑙瑩簾訝水晶空可倩凌
人守休令囑子通凝神塵自遠比德日應崇榻窄堪容
隱齋清亦策功試言蔚宗輩好爲傳壺公

送楊翼之還清江

傅若金

同郡晚相得還家君獨先艱難萬感集離別衆愁牽盜
賊凶荒後干戈餽餽前故園思縮地行路歎登天郡國
方收馬江湖總稅船遂嫌居鬱鬱竟作去翩翩芝嶺空

忘世桃源似欲仙游鯤輕萬里歸鶴異千年已謝蘇秦
印無論祖逃鞭道瞻匡阜雨山背薊門烟遠色芙蓉浦
濃香穉稷田藏書猶有壁坐客豈無氈我亦懷三釜誰
能乞一錢將詩不敢寄多是斷腸篇

清江圖

貢性之

江驛背孤城江流繞舍清露枰松下奕驛騎柳邊行帆
落晴窻影鐘傳雨寺聲堆牀餘簡帙列座總耆英燕語
能留客鷗馴解結盟詩郵趨埃吏衙鼓集關兵薄俸尊
仍滿新知蓋屢傾不才翻自愧何以答深情

明

綠錦池爲定侯賦

劉永之

官沼湛芳泉紅權照綺錢藻絲翻玉鯉柳葉曳金蟬日
護瑰文麗雲迴碧甃圓凌波垂洛佩向月映湘絃樹影
浮觴近花陰列藉連鑑湖賓客在共賦綠荷篇

天寧寺同梁孟敬曾得之較郡志 彭 鏞

桃花新雨霽楊柳曙烟霏背郭尋松室披榛過石磯江
波春自艷汀草暖猶微禪榻烏皮几儒冠白紵衣傾梧
欣鳳舉附驥愧蠅飛地志評今古山經較是非谷幽鶯
尚澁簾掩燕宜歸更約黃庭客仙源采蕨薇

天寧寺觀五音石魚

梁 寅

瑰石含幽響神魚入巧裁揚鬢方丈室驪首雨花臺音
逐神光動鱗隨日影開錦鯨同詭狀桐鯉愧凡材泉吼

松邊應僮開竹下同點頭會悟法劫燬不成灰淪棄經
風雨遷移出草萊熱生敲處火潤帶臥時苔夏后璜今
復周王鼓未摧希聲洗煩慮日欲上方來

國朝

就亭卽事

沈壽國

高亭平雉堞曲檻覆桐枝疏鑿原因舊登臨無不宜江
聲清入座峰影碧侵帷花對新吟發朋來綺席移短垣
鄰竹院半壁傍蓮池散帙鶯啼過閔階鶴步遲放歌天
地外悲愍吏民時纜解夕陽岸犢行芳樹籬雲霞變倏
忽畦隴列參差意愜朝隨杖風疎晚進卮趨庭看得句
下榻愧酬詩勝事今雖蹇千秋已在茲

六言律

明

和天寧松室道人

梁寅

石橋水隔人世珠樹鶯啼早春草色漸宜步履松枝不
礙車輪施食臺留青羽放生池有縱鱗尤愛汀洲杜若
采贈山中遠人

詩七言律上

唐

及第後江寧觀競渡寄袁州刺史成應元

盧肇

石溪久住思端午館驛樓前看發機鞞鼓動時雷隱隱

獸頭凌處雪微微衝波笑出人齊瞰躍浪爭先鳥退飛
向道是龍剛不信果然奪得錦標歸

鄧志曰此詩爲寄袁州刺史之作似不必錄入然曹
能始名勝志云臨江蕭灘石谿寺有覽勝亭爲盧肇
觀競渡處此詩云云則及第後觀競渡追憶石谿讀
書舊時事也錄此足以知寺名石谿所自來矣

宿臨江驛

李中

候館寥寥輟棹過酒醒無奈旅愁何雨昏郊郭行人少
葦暗汀洲宿雁多于祿已悲凋髮鬢結茅終愧負烟蘿
篇章早晚逢知己苦志忘形自有魔

留題閣阜觀

伊用昌

花洞門前吹似雷險聲流斷俗塵埃雨噴山脚毒龍起
月照松梢孤鶴回蘿幕秋高添碧翠畫簾時捲到樓臺
兩壇詩客何年去去後門關更不開

讀書臺

鄧志曰此詩疑後人所作
舊志刻歐陽董姑仍之

歐陽董

坐上沿江碧玉流讀書人住幾春秋塵埃青竹陰連棟
風雨黃茅冷盞頭一榻蠹魚今槁死千年別鶴舊經由
吾方曉夜遙山夢世事從今只釣舟

宋

送李寺丞歸清江

楊億

故里懸車獨被榮禁庭永日味丹經三冬密雪遊梁苑
一席歸風過洞庭南國鶯花供綺宴西山芝朮養椿齡

津亭送別春雲黯未識鴻飛在杳冥

送李寺丞歸臨江

王曾

辭榮知退出塵埃澤國皆稱隱逸才清世不爲王事累
白雲重向帝鄉來僧因好古留碁訣鷗爲忘機戀釣臺
應見酒旗回馬首遠烟濃淡百花開

除夜泊臨江言懷

趙抃

縣封蕭索楚江澄旅况吟懷冷似冰漏促已交新歲鼓
酒闌猶剪隔宵燈立身從道思無愧得路由機患不能
未報君恩踰四十青春還是一番增

崇真宮

陶弼

萬仞天然閣卓形陰陽不似衆山青一區海上神仙宅
數曲人閑水墨屏華表鶴歸春谷響玉京龍起夜潭深
可憐張葛無人繼三級高壇拂杳冥

離京後寄貢甫隱宜

哉生魄後一日雨中作

劉敞

清川如帶屢回環信宿猶居百里閑敢恨淹留同杜渚
正憐風雨似梁山月殘虛魄無由共雲映高樓不可攀
却怪夢中翻識路化爲蝴蝶一飛還

臨江蕭氏家寶堂

蘇轍

高人不解作生涯惟有中堂書五車竹簡多於孔氏壁
牙籤新似鄴侯家田園豈是子孫計青紫今爲里巷誇
富貴早知皆有命君應未厭十年賒

題家寶堂

孔文仲

曾聞教子薄金籬又得傳家構寶亭四座巾箱森武庫
一門冠蓋聚文星春餘草樹連吳暗天濶峰巒入贛清
夢寐共遊今十載南飛何日學鴻冥

二十年前憶共登時光過隙只堪驚圖書誰似君家富
山水從來故國清坐接遠峰煩暑盡閑吟殘月小牕明
知公不替青氊舊桂籍堂中有姓名

次韻答清江主簿趙彥成

知命

黃庭堅

日轉溪山幾百遭厭聞虎嘯與猿號笙歌忽把二天酒
風雨猶驚三峽濤已作齊民尋要術安能痛飲讀離騷
看君自是青田質清唳當聞徹九臯

暮春張師明攜酒招同向伯恭何浩然徐嘉會登清

江臺醉中感賦

錢 恂

干戈未定欲何之縱目江臺春暮時客裏川原風景異
塵中歲月鬢毛知情非落魄貪杯酒志豈猖狂愛賦詩
惆悵家山何處是君親千里繫遐思

過九坡

在臨江軍

葛立方

行盡千山與萬山鍾情偏在此烟嵐海波神闕今饒六
仙女巫峰尚欠三兩濶蒙條生翠滴雲封疊穎瑩脂涵
卻思九坂修梁第空使斯民命不堪

和劉子澄

朱 子

經旬不到鹿場陰夢想飛馳不自禁幸有高賢同勝賞
何妨折屐共幽尋徘徊未厭詩書樂感慨難忘忠孝心

更對豐鐫哦伐木風泉雲壑自清吟

崇真觀

磴道千尋風滿林洞門無鎖下秋陰紫臺鳳去天關遠
丹井龍歸地軸深野老尋真渾有意道人謝客亦何心
一樽底處酬佳節俯仰山林慨古今

讀鄒震父詩集二首

姚鏞

君參選體源流遠力挽唐人氣脈回句法閎從南嶽出
吟聲元自石屏來淡於古井無波水清似孤山老樹梅
見說鈔歸湖海集可能傳到道鄉臺

鄒郎雅意耽詩句多似參禪有悟無吟到草堂師杜甫
號爲梅屋學林逋蘭滋草木山含玉光動波瀾水有珠
學力到時言語別更從騷雅著工夫

徐太古主清江簿

薛嶠

四靈詩體變江西玉笥峰青首入題舊隱乍違鷗鷺去
新篇高與簿書齊身閒自喜瓜期遠俸薄還因楮價低
握別正逢寒食日洞庭春漲草萋萋

盤園

馬廷鸞

雲水鄉中樓觀開溪山好處興悠哉平章風月歸茶鼎
管領烟霞付酒盃吟骨已成枯鶴瘦機心莫遣狎鷗猜
丈夫整頓乾坤了黃帽青鞋歸去來

元

雪巖詩

吳澄

木長柔枝草長藤鳳皇岡下老雲仍清名寂寂無名叟
白髮蕭蕭有髮僧晴霞撒珠泉噴薄暮烟凝翠石峻嶒
寒山生怕人饒舌喚作雪巖渠不磨

送黃修永之杜清碧學

劉堦

眼中塵土正昏昏華蓋風高翠入雲一代風流超晉宋
百年禮樂寄河汾波寬好看魚龍化天遠空憐雁鷺羣
亦有平生觀海意出門萬里獨慚君

臨江軍守臣陳公

元桂

劉麟瑞

衡湘幹腹抵清江太守乘城誓不降哨馬遠嘶驚墜鎬
雄兵遙吒殞飛鏃玉麟符已還宸陛金鳳洲堪立帥幢
寄語豫章徐孺子聞孫勲業未歎無雙

題皮季武所抄吳草廬周栖梧孫少初皮季賢四十

年前閣阜碧厓聯句後

何中

阜嶺清遊記昔年彌時桀句儘難聯公如樂正超諸友
我似延年詠五賢自古高才須蓋世無前偉績定由天
世間何限經綸手獨立滄茫意不傳

題陳達觀浪吟集

語淺遙知人意深仰難決背俛難臨緱山駕鶴月千頃
巴峽啼猿秋一襟斗極光寒天識劔閬城境絕客成琴
馬蹄飛電長安近直上鼇峰一萬尋

送進士劉聞文廷赴臨江錄事

虞集

清江百尺石爲城太華千峰積雨晴官府幾時書帙靜

漁舟盡日釣絲輕故家好訪春秋學上國多傳月旦評
頗有老懷煩錄事到州爲問范先生

玉華仙峰

何處清江擁玉華手題名榜寄仙家光凝石室千年雪
影動銀河八月槎藏藥寶函騰紫氣說詩瑤圃散天葩
奎章閣吏無能賦得似新官蔡少霞

送范德機

楊載

往歲從君直禁林相於道義最情深有愁併許詩頻和
已醉宣辭酒屢斟漏下秋宵何杳杳牕開晴晝自陰陰
當時話別雖匆遽祇使離憂攪客心

與杜清碧先生四首

丁復

武夷山水先生宅山上松聲落醉眠不廢乾坤有清氣
至今巖壑出神仙南陽諸葛吟梁父西蜀楊雄草太元
聖主如天昭日月九重虛席正求賢

先生九曲溪邊住錦里風光太逼真當代如求董狐筆
名家政要杜陵人玉堂金馬頻催詔朱紱銀魚嬾挂身
聞道少微星不夜已知江上有垂綸

五雲絳節下林邱萬里銀槎上斗牛聖代已興周禮樂
大儒宜法魯春秋上林花霧冥冥濕太液恩波浩浩流
清夜夢回高閣遠一簑烟雨泛漁舟

聖君虛席禮賢初太史濡毫應詔餘沙草總肥金驪裏
宮花時落玉蟾蜍晉朝人物推安石漢代文章識仲舒

成業經綸有如此人生須讀五車書

送杜清碧入京二首

薛 漢

玉笥峰前久白雲銅駝陌上暫紅塵有書未肯干時宰
命駕惟應訪故人滄海魚龍波浪濶顛厓草木雪霜頻
逢時少試經綸手回首山林迹未陳

風雨蓬蒿病已侵那堪送遠更秋深離情不斷千尋綆
高義難磨百鍊金喬木參天原有節閑雲出岫本無心
湖山搖落關河杳後夜相思遣夢尋

簡西江宋子與令尹楊翼之李斯立二先生

成廷珪

八月涼風催早寒家山空憶路漫漫滄江無處問書信
白日何人生羽翰曉霧漲天迷故國夜潮流月到長干
諸君莫責王夷甫我輩深慙管幼安

寄題杜原父懷友軒

張 翥

尺五城南近世紛移家來並武夷君他年功業誰青史
此客山林白白雲石氣曉侵書幌濕溪聲時雜櫂歌聞
故人已同棲約杖策行穿虎豹羣

崇真宮醮罷勅畫吳宗師像

貢師泰

海日曛曛照九衢霓旌霞旆擁高居尚方勅畫仙官像
中使傳宣學士書劍氣朝寒垂白練丹光夜暖出紅蕖
石壇醮罷清如水猶聽松陰起步虛

送章高士兼簡杜清碧先生

鄭元祐

風日晴縑楊柳青翩然獨鶴過南溟山中每憶羅公遠
海上重逢武達靈榕葉擁雲山似簇蠟房烹玉酒初醒
小冠子夏如相問爲話窮愁老一經

題范德機編修東坊稿後

張雨

一編上有東坊字慚愧詩中見大巫直想瘳生如飯顛
竟從癢處得麻姑咸池水淺孤黃鵠空谷天寒病白駒
擬共風流接尊酒祇愁塵水沒雙鳧

清江縣志卷之二十一

藝文三

詩七言律下

明

寄鄒逸人椿齡

劉永之

幽居路口竹松深時有高僧獨自尋山起碧嵐供遠眺
泉分疊谷響長吟鳴鳩拂舞翻新解野雉朝飛入素琴
直使一簞常寂寞也勝渠逐彈丸金

寄虞心山居隱仙寺

山房借得新泥就晏食隨僧拾澗菲隣甕酒香朝可貴
佛幢燈火夜堪依沙田紫蔗家家熟野逕丹楓處處飛

待約彭鏞去相覓哦詩寫遍竹間扉

清江文會詩爲崔驛丞賦

凌雲翰

清江之水如練澄盍簪此地皆良朋一錢尙懷會稽守
二松好效藍田丞忘機鷗鳥偶到座入饌鱸魚還可嘗
蘭亭陳迹在圖畫新詩莫惜傳溪藤

歸隱

張美和

歸來江上看青山種柳成陰漸可攀舊夢任隨流水去
此身相伴白雲閒錦囊書帙收千卷金井丹砂貯九還
畱得玉堂揮翰手賸題佳句落人間

太平觀靈樞堂有軒臨池扁曰山水閒訪曾鍊師畱

宿賦之

梁寅

道人住在小元洲山水之間庭戶幽松挂片雲招宿鶴
池開半月隱靈虬仙書待寫榴皮字燕坐眞乘蓮葉舟
爲論先天過夜半知師心與太虛遊

送清江劉立愛赴桂陽學錄

千丈孤城還萬山新除學錄小官閒郡侯拜朔惟陪禮
弟子鳴絃長掩關燄燄文星南斗下迢迢桂水白雲間
奇才好進安邊策早從樓船定八蠻

舟還樟鎮呈周所立

停舟蘭渚步東風來訪高賢柳市中客權五湖千里別
漁竿一壑兩心同琴彈山水清殊俗賦寫煙雲老更工
天上故人多厚愛不教後鶴怪山翁

登玉華峯

鄒幼亨

十二峯頭步武難飄然身在九霄間煙霞之外無他境
宇宙以來有此山道侶月中騎鶴去仙翁雲裏採芝還
豈無方內紅塵客景仰高風亦靦顏

虎跑泉

王恪

甘泉湧出白雲根千載於菟跡尚存神物有靈通地脈
孝心無路答親恩銀牀曉滴青桐影玉甃寒生碧蘚痕
珍重河東賢太守天書曾爲表芳門

香積寺

解縉

卓錫靈源歲月深至今此處作叢林老僧自有降龍鉢
長者能無布地金風挾鐘聲過渡口月移樓影到江心
分明宛若圓通境時有頻伽唱好音

贈胡海澄臨江教授

金幼孜

列職十年居禁侍除書一日遂恩私君家壽母堪迎養
吾郡諸生總在門長晝松陰分講席四時江影照清尊
考亭千載流風在待得歸休與共論

贈廷振楊處士還清江

客中幾見鴈南飛忽向都門賦式微江樹碧雲迎去棹
西風涼露動征衣入門掃徑餘松菊倚杖看山老蕨薇
遙想到家秋未晚比隣酌酒話京畿

題荆林別墅

陳誠

舊住前村歲月深新營別墅徙荆林煙霞泉石孰佳趣

第宅田園遂夙心，令子賢孫書自讀。
芳隣貴戚酒同斟，輞川盤谷俱陳迹。
畱得清名照古今。

送李大使還清江鎮

黎恬

三載司征報政成，還官深喜拜恩榮。
金臺行色逢秋暮，玉筍歸心共月明。
望入長安孤鴈遠，到來古鎮片帆輕。
煩君寄語周通府，渭樹江雲總是情。

送桂陽判官孫郁復任

習嘉言

夕郎風采憶清秋，久向湖南判一州。
編戶幾人傳德政，都門此日別交遊。
煙中柳色迷官驛，雨後鶯聲傍客舟。
樽酒不堪重載處，楚天雲水思悠悠。

送太平知府徐仲敬致仕

老辭銅虎出楓宸，思慰高堂白髮親。
二十年來賢太守，六千里外獨歸人。
忘憂萱草慈幃曉，遺愛甘棠故郡春。
還遣石龍江上月，梅花相對轉精神。

送鄒誨訓導赴清江

新從闕下拜儒官，把酒臨岐更盡歡。
魯甸風聲黃葉早，鄱湖雁影碧波寒。
蒲帆漸覺仙鄉近，芹泮應知樂地寬。
故郡居官從昔少，錦衣白晝幾人看。

禪居寺

徐霖

釋褐歸寧暫許閒，清秋飛蓋訪禪關。
參龍人去雲生岫，騎虎僧歸風滿山。
琪樹幾多圍梵刹，好花無數護靈壇。
笑談啜茗坐良久，白鶴一聲天外還。

次莊定山清江雜興韻

陳獻章

家學華山一覺眠圖書亦在枕頭邊傍花隨柳我尋句
剩水殘山天賜年竹逕旁通沽酒市桃花亂點釣魚船
平生獨愛孫思邈自古高人方又圓

觀宋徽宗藏蘇長公書金剛經碑 夏寅

東陂晚歲閱西方宦海隕然髻髮蒼已鈍鋒機輪玉帶
又疲精力寫金剛殘碑認脚真元祐秘寶傷心是靖康
得與山陰同逸少也應微意托空王

府譙樓 王佐

危樓落就冠湖西畫棟飛甍拂彩霓四面山河開壯麗
二儀清濁判高低龔黃今古佳名並賓主東南眾美齊

江漢風流如昨日可能授簡不畱題

郡齋詠雪 沈棨

風俗占冬甲子陰臘前風雪到如今本來天意農宜麥
似妬匏翁白滿簪葑屋屢屨炊飯盡誰家狐貉酒杯深
郡齋何許堪勅敵賴有梅花鐵石心

閔阜山 顧應祥

踏破雲山幾萬重笑呼葛子共談空著衣亭在雲霄外
洗藥池存草莽中不見九龍歸古洞欲騎雙鯉駕長風
醉餘太極峯頭坐搖指蓬萊海日紅

閔阜山禮斗壇 孫偉

莫訝仙翁躡蹻危斗邊雲壑是真棲一枝樹影容身得

往事風波問是誰
灑氣迴臨高鳥背
澗香新鬪茯苓脂
道人相坐靈巖石
話到前峯月上時

遊慧力寺

李應祺

平生慣覓好山遊
此寺臨江水石幽
翠巘丹林環福地
芙蓉金菊逗深秋
舍人愛客延清賞
學士題詩在畫樓
滿路松風欲歸去
老僧仍乞姓名留

王臣

非圖非夢似曾遊
步入招提境最幽
塵世忽忘千古慮
石林常占四時秋
天空樹色遙屯野
夜迴江聲半在樓
今日已公茅屋下
茶瓜還許杜陵留

沈愷

歲晏乘閒憶遠遊
松齋竹院本清幽
讀書臺在人何處
伏馬橋荒事已秋
弔古不須頻問主
憑虛惟有一登樓
浮生却悟總蘭若
莫向名山卜去留

駐樟樹鎮用宜學韻

鄒守益

大火西流暑未舒
扁舟東下興何如
十年霜刃誰當試
一代天常敢自虛
羣俊總看翔鷲鷲
狂童應自化蟲蛆
金陵臥病眞時雨
攘袂無勞說吮疽

贈臨江節推范軸山時視陶昌江

羅洪先

郡中疑獄盡輸平
歲以賢勞屢代更
異日烏臺稱令子
同官溢浦卽難兄
器如瑚璉堪登御
囊絕苞苴豈近名
夜月昌江輿誦滿
不知曾否達承明

清江縣志 卷二十一
贈分守陳見吾赴兩浙總憲

早聞驄馬動江干瀛海歌聲幸未闌五嶺北來村郭靜
千峯東去海潮寬蘇隄歌舞常妨禁越國苞苴不到官
誰向行臺畱氣色空懷芝草露華寒

金城寺

嚴嵩

欲從淨土證無生彷彿黃金築化城甘露門前添黛色
曉霜鐘裏動寒聲雲垂西極雙峯秀水激東巖九郭清
野渡杯僧何處所至今還說是吳平寺址卽舊吳平縣

雷祠紀遊和袁陶齋別駕二首

錄一 王養正

冠蓋羣遊東郭外笙歌遙集古壇前半郊雲物供吟嘯
萬點風花起客憐勝地偶欣蹤蹟共清時還擬姓名傳

乾坤隨處皆眞樂何必懷珍始自妍

雷祠紀遊二首

袁表

四月清和雨未乾出郊遊衍集衣冠葑田漠漠分秧水
曲徑悠悠入竹寒綺席憑虛喧鼓吹行廚隔隴進杯盤
諸公雅興眞良會更有青山作畫看
賓主相期聚列仙尋幽偶得古祠前天開野色遙相望
春盡風光倍可憐泉壑自應今日好詩篇能得幾人傳
歸途未覺斜陽暮蒼靄輕籠翠綠妍

雷祠和韻

錄一 徐正

吏隱寧知是謫仙勝遊初不減春前平林過雨翠欲滴
古堞歸雲淨可憐徐穉風流應獨遠袁生詞賦已先傳

緣知明日雪壇上物色分題總倍妍

和袁陶齋雷祠紀遊

黃仁山

雨霽山城草色乾滿郊清景襲衣冠林邊曲奏笙簧合
野外杯行翡翠寒淡日暖風縈荇帶荒塘綠水泛荷盤
賡酬自有高人在得句應書卷裏看

謾解金龜醉列仙翛然玉樹倚風前時光到眼原堪悅
春色如塵亦可憐歌吹未闌情已洽主賓不語意先傳
酒酣政爾乘歸興細草幽花作意妍

和袁別駕雷祠紀遊

聶璜

題遍江山墨未乾又從真境訪黃冠洗天花雨催詩急
著地松風吹帽寒近郭酒沾添瓦甕遠方齋味賽春盤
歸來光影分燈燭拍手兒童帶笑看

隱仙寺

龔亨

衰白侵尋入老年偶從仙寺集高筵人間軒冕全無意
鄉里耆英似有緣詩句且居唐體下風流休向晉人前
秋涼再作香山會酌酒相歡繼浩然

寄龔發軒提學

守愚

敖英

向來南國看花伴聚散飄飄感慨頻君有文章闢六詔
我慚蹤跡滯三秦蓬萊雲氣青冥濶逝水年華白髮新
欲寄所思無雁過牀頭風雨劍生鱗

觀夢堂偶成

瑞筠山北小堂開堂下春風繞釣臺此日狂吟花鳥笑

他年寒食子孫來從教萬物爲芻狗且領千峯入酒杯
今古到頭俱是夢雍門何事使人哀

晤郡侯管慕雲夜酌

張春

意相投處袂難分一榻山城且共君燕識舊巢花外入
蛙喧新水月中聞豈無良醞笙歌循更有名香几席焚
見說扁舟今夜發何時重與細論文

天寧寺別李伯承

王世貞

長安三月芳意賒習習柔風黃鳥斜春社虎溪勞遠送
暮雲鳧舄未堪遮城闌倦借支公馬江路吟逢潘令花
去住卽看同幻迹向來離合不須嗟

杜清碧故宅

傅汝舟

不見平川杜伯原社煙邨靄自朝昏徵君故宅遙相問
去國微言竟莫存世亂冠裳終草莽年深鄉井少兒孫
清江碧嶂愁看汝夜雨寒燈夢掩門

訪杜徵君遺宅

江一源

幽探遠弔杜徵君衰草淒涼怨夕曛漫憶儒林開館閣
空畱清碧刻詩文巖花半落名難辨野蔓斜侵路莫分
獨對蒼山搖落處蕭蕭千樹鎖寒雲

太平觀偶書

李先芳

堆案盈庭吏事羈轉於行役是閒時山當玉笥春雲滿
江入羅溪暮雨垂褊性最宜仙館靜初心惟許道人知
旌陽去後畱丹井爲訪眞源拜藥師

次魏浣溪別駕遊閩阜韻

龔挺霄

十年京洛緇塵眼到得看山卽更明
鞞翰林木嚶嚶合
肩曩芙蓉冉冉輕使節乍看搖翠靄
琳宮相倚在青冥
追陪逐浪衣纓後一陣天風下鶴笙

明經書院

劉松

秀水靈巖護紫煙藏經丹閣泮宮前
木天瑤帙然藜夜
玉笥牙籤振鐸年
鄒魯斯文存正學古今吾道有諸賢
偶從絃誦瞻光岳奎壁星臨斗極邊

送周郡守

朱孟震

千騎西方擁使君
杯前行色莽風雲
江湖地接雙旌入
牛斗天懸一劍分
臥閣定知花繞檻
隨車應見鹿爲羣
自逢公瑾心長醉
不是離筵酒易醺

登寶金寺華光閣

黃之俊

高閣登臨憶昔年
依然臺殿倚江天
三車寶偈言詮外
一葉慈航彼岸邊
陶令只今歸白社
遠公常日說青蓮
風塵突兀欣回首
贏得閒身學坐禪

鹿江夜雨有懷黃嘉遜

一鳳

張叔鏜

風雨孤蓬抱短衲
各天容易感離愁
靡蕪其泛三冬雪
解艫驚分二水舟
對酒強爲嵇散飲
逢人羞說馬卿裘
祇今且聽鄉關曲
小草行須賦壯遊

明致居苦雨

明致居在郡城

負郭茅齋卜築深
吟牕愁坐晝陰陰
小池忽漲魚趨市

急雨如傾鳥避林石鮮難支南郭履礎流時漬子與襟
奚奴更道鄉村苦萬井煙沈淚不禁

梅厓紀勝

龔道立

何年學舍題明德此日高山切景行信國精忠孤竹凜
寒厓冰雪一梅清春明旅夢占前定伏臘烝嘗啟後生
自是堂顏能不朽千秋廟貌肅儀型
敦倫此外無餘德除却人倫若個明忠孝一源尋道脈
誠明互用覓心精能馨黍稷惟明德剩有梅花不世情
司訓當年真祭酒少卿今已待和羹

觀瀾亭

陳述

泮宮南畔大江濤亭瞰清流體道深俛仰孟軻觀海歎
還推曾點浴沂心天光雲影同朝暮山色溪聲自古今
欲識此中無息意諸生須用惜分陰

登一覽臺

章山富壽岡東吐一峯形最圓秀土名金星堆宋時作一覽臺其上今廢蓋郡邑之

鎮山也

秦鏞

臺基荒落今非昔古樹婆娑尙有靈地勢融流稱水國
天然重鎮得金星試占雲物當爲瑞却望炊煙幾處青
最喜章山春雨後流泉處處入農經

黃石丈元宵前一日小飲

楊廷麟

籬邊殘雪已兼旬剪燭燒蔬餉野人簾外水田流北郭
春前燈火近東鄰一牆風雨梅花健幾處干戈醉眼頻
此夜與君話疇昔不妨同是五湖身

贈小范孝廉兼弔清江閣學

葉襄

萬里清江浪拍天故人消息動經年
重來麋鹿長洲苑歸去荒蕪彭澤田
虎帳角殘辭部曲龍沙旗折偃戈船
盧謨淪落劉琨死回首章門一惘然

國朝

題愚樓

李元鼎

風高閣阜接遙汀盡說登臨似敬亭
好句驚人誰謝眺開尊筵客幾瞿
矚憂時每下窮檐淚懷古重鐫座右銘
吏散斜陽歸鳥外隔城漁唱晚峯青
曾從蕭水上愚樓奔赴煙嵐一望收
古樹環橋分黛色長江入檻與雲流
游情屐滿千山雨宦况寒生五月秋
匝地橘香堪對酒懷君祇擬在滄洲

登就亭

施男

素竹爲亭物色幽天然結構署西頭
未聞相木歌邪許只解巡檐索和酬
樹裏河流來斷岸沙邊鷺浴接輕鷗
仙梯合在青琅外尙有閒人說閩州

就亭作

蔣嘉謨

石磴紆迴草露間竹亭縹緲數躋攀
帆飛閣外滄波闊鶴立桐陰白晝閒
弄笛胡牀秋未老看雲黃嶽夢先還
何時不負登臨興把酒經過閣阜山
于役北上適來鳳亭落成郡僚諸公集餞

施閩章

金鳳洲前橘柚香草亭十笏面滄浪分行碧樹橫秋色
一片青峯滿夕陽遊子驚心天路遠故人知我野情長
宵深月出還留酌如此江山不可忘

就亭落成

新營竹屋傍城頭吏靜時聞江水流古樹當檐堪倚嘯
青山入座自開愁含情蘭浦思公子避世瓜園想故侯
待得春風成爛熳卜居何似浣花幽

送張清江升暘之任思恩

鄉心七載夢長安粵嶺重禁客路難木落洞庭天際遠
猿啼瘴海雨中寒山村野市多獠戶負弩稱觴半土官
南北風煙各回首勞臣萬里慎加餐

臨江春暮講學龍岡書院示諸子

時連雨
適晴

講席春風四座生絃歌一日滿江城蕭灘帆落爭來客
閤阜峯開特放晴經學自知慚士句時賢應復有康成
龍岡鹿洞元相接高會重含異代情

鄧志曰此詩與府志全異惟首尾詞意稍同當是
晚年自定本今從愚山學餘詩集錄入

寄屈清江遜公

河陽能吏自聲名憶昨扁舟送我情一臥空山依桂樹
幾回飛夢到江城龍岡講席寒雲在橘園官亭茂草生
努力莫嗟懷抱盡縣前秋水照心明

遊慧力寺

黃尚賓

卷二十一
髻年登眺瑞筠山古樹根盤石磴間月上竹牕閒老衲
雲深松嶺護禪關降龍鉢底滄波靜伏馬橋頭碧蘚斑
六十餘年渾似夢憐將清隱對雙鷗

過臨江避暑朝天宮

吳雲

我到朝天道士宮此身如在萬山中龍頭笛弄三更月
鳳尾蕉留一院風殍罷胡麻施烏飯翻殘仙篆到僧鐘
飛昇皆說梅溪老化鶴歸來或可逢

昇去

梅溪仙姓胡昔居朝天宮相傳白日

黃虎溪遺石耳

王士祿

霞縈巖穴日氤氳石耳盈筐遠見分
刷處恍疑衝澗雨到來猶似帶山雲
漫誇烏頸甑中蕨不數青泥坊底芹
何允舊曾耽肉食緣君陡欲斷葷葷

寄題清江楊先生祠

王士正

蕭江襟帶古祠堂祠外山高一水長
夜靜魚龍尙悲嘯歲寒松柏自青蒼
綸巾諸葛真名士楚些三閭弔國殤
秋菊春蘭竟終古雲車風馬日飛揚

登閩阜次朱子韻

沈壽國

幾年翹首望雲林藜杖閒探古洞陰
藥臼碧苔含雨潤斗壇荒草向秋深
幽巖時有題名客怪石徒懷控鯉心
莫訝滄田人世變神仙寥落到于今

臨江太守王公招飲集慧力寺

高詠

招提有約暮春時飛蓋先傳到水湄
太守行廚能醉客

已公茅屋可題詩清江碧嶂晴偏麗玉管銀簪晚更宜
最是昔年吟賞處風流只似習家池

遊來鳳亭步愚山先生韻

張鍾瀛

踏遍春風屐齒香閒隨漁籟逐滄浪看花是處容狂客
買酒前村問夕陽座滿雲光知水近杯浮霞氣映溪長
湘靈黃鶴尋常事別有精神不可忘

舒嘯亭舊爲錢堅白先生讀書處余未及先生之門
幸與先生公子遊坐臥此中說劍彈碁芳樽坐滿曾
幾何時而往事難尋伊人不可復見矣感慨係之遂

成近體

碧樹虬松繞四圍依稀城郭主人非花辭故樹飄紅雨

風弄新蕉舞綠衣此日難聞行不得當年長賦醉無歸
鵲巢幸許鳴鶯假金石歌聲伴落暉

寄清江張升暘明府

熊 僎

握手相歡在鳳城好風侵曉動行旌龍岡草木迎春秀
鹿渚波濤印月清煙火邨原畱轍影謳歌里巷和琴聲
埋輪自有先型在驄馬應傳御史名

鄧志又有熊僎和施閏章講學讀書臺詩按府志
當日講學在新淦所建之陶侃讀書臺非清江地
也鄧志失考特爲刪去

寄懷陳擎石太守

黎 騫

登高懷遠露沾裳送盡鴻聲過苑牆樂土已看歌召父

名臣還借理淮陽斗杓氣接卿雲見江水波澄惠澤長
擬奏金徽酬白雪頻飛清夢到黃堂

智若姪理城西之舊第飾昭文之別館牙籤雲蠹緗
帙綺披誠讀書逸致也偶出文太史字因和其韻以
誌一時

風送蘭香繞畫隄霞光雲影楚天西珊瑚架筆分行麗
芸葉藏書萬軸齊玉琬應空燕市駿杏花猶待曲江題
石湖一派瀟湘意綠野奎章自不迷

宿慧力寺

朱統錕

冬初攬轡出南郊乘暇招提宿五宵鐘定更深熒佛火
煙寒古殿寂僧寮筠芝各易隨龍象桑海時移等鹿蕉
爲說無生無上義支公物外自逍遙

辛酉仲春慧力寺訪自之和尙歸途偶雨

顧嗣曾

城外招提江樹青亂煙石磴上芝亭山僧舊畜降龍鉢
使者新題瘞鶴銘旛影日高依寶座鐘聲夜半度沙汀
尋幽不惜芒屨濕雨勢飛空自杳冥

庚申秋月贈慧力寺自之和尙

郭景昌

我來湖西未五年松風深處幾周旋洗心澗滴曹溪派
芝草亭生百丈煙數畝閒雲非佞佛
時余借郡縣長一
共捐置僧田
天明月可逃禪木樨初放空山滿知是天香韻已傳

慧力寺重興

黎其愚

城南古刹碧山岑亂後虛嗟鐘板沈乍聽松風傳梵韻
欣看江月映禪心危亭獨眺雲天遠曲徑斜穿花木深
我欲尋真參不二談經夜靜有龍吟

秋夜懷智門和尚

敖汾

已公茅屋樹閒藏萬綠陰森繞上方皓鶴傳更山自寂
涼蟾入座夜初長參來半偈心多妙悟到無言象亦忘
愧我塵襟猶未滌談經何日對禪牀

題萬竹庵

甯堯采

負郭祗林竹萬竿凌空插翠影團欒乍逢晴日還疑雨
未到清秋已覺寒密葉翻風傳法磬老梢弄月入經壇
題門頗憶浮山老綠雪陰中盡日看

門額爲愚山改
題藥地手書

樟樹鎮

桑調元

吳商蜀估走駸駸塵市無關物外心老體扶持須藥物
秋容點綴得楓林一天遠影衡陽雁九月寒聲楚戶砧
不見當年古樟樹數行衰柳映江潯

假館朝天宮

錢順則

愛靜長棲羽士庭洞天別自闢軒櫺一編夜對銀花白
萬葉秋空鐵樹青未蠟東山安石屐還饒西蜀子雲亭
黃冠盡日渾無事說與齋頭道德經

登清江碧嶂亭懷二劉三孔

王泰性

見說睂山早擅名臨陽兄弟並崢嶸舊家此日無遺稿
新法當年有直聲花萼久空飛斷雁草亭猶得傍孤城

一筇詩思歸何處望入清江眼倍明
送蘭畹給假省親

不信仙郎真個歸著鞭先我出京闈少年報國才如海
此日還家錦作衣雲壓匡峯春雁斷波生淮水鱖魚肥
華堂料得稱觴日猶帶天香染絳緋

幽暢亭用韻

李建中

每笑鬱懷無處寫獨誰幽暢此名亭蕭灘浪自飛花白
閤嶺雲還入竹青鈴語移時喧鶴徑棹歌殘照下漁汀
年來觴咏空岑寂畱得愚樓舊典型

春日遊南山寺賦懷

楊如源

每厭紅塵刻未閒春風何處好看山爲聽西竺談經去
且折東陂解帶還雀舌香聞松牖下犬牙新茁竹林間
漫勞僧設延賓榻共坐蒲團一夜關

泠泠鐘動數聲閒彈指斜陽已在山幾戶牛羊看欲下
一林烏鵲自知還真宜著我風塵外未解從人俛仰閒
咬得菜根滋味出幽棲無處不禪關
三載懸車賦早閒淋漓醉墨遍雲山尊罍莫厭頻斟酌
隣曲猶能共往還白鶴方眠深徑裏黃鶯况噪綠林間
歸來意思無拘束一盞書燈靜掩關

清江晚眺

張天棟

年來幽興在林泉江郭晴行眼倍鮮閤嶺殘雲飛夕照
蘆汀衰草動寒煙紅稀遠樹秋霜岸綠漾輕橈野水天

清江縣志 卷二十一
強欲將身侶魚鼈多情鷗鳥竟相憐

石谿寺

譚良佐

雲鎖禪門晝不開昔年香火劇堪哀空傳名士談經處
寺有唐盧肇讀書臺不見高僧挂錫來野鳥窺牕鐘寂歷階苔遮
徑石崔嵬滄桑世事原如此選佛還同春夢回

遊慧力寺

楊有濟

祇林幽迥碧雲端雉堞參差入畫欄移徑好花通院馥
拂簾疎雨過江寒經臺振錫人何在石室傳衣臂欲殘
擬淨名根修勝業風旛動處覓心安

道經金城寺

方懋祿

征馬斜陽入翠微雲霞深處鎖巖扉木魚傍郭纔流響

瑤鶴巢城欲倦飛風葉滿前妨客步雨花無數點僧衣
若非一綰來遊此鷺嶺還疑世上稀

歸自樟樹偶憩回龍寺

周秉衡

鹿江越渡訪荷湖穿樹沿隄縟綠敷撲蝶乍驚逢令序
回龍却喜拂輕襦寶珠花滿莊嚴界玉版禪參香積廚
歸向官齋還寂坐詩成一笑酒堪酌

野溪世叔招同幕中諸子遊慧力寺卽席賦呈兼以誌別

董元度

共約春郊踏野塍千年古刹據高陵孤懷暫作逢場戲
倦客真同退院僧點點苔留三徑雨鱗鱗水似一壺冰
宣城遊後吟壇歇重向紉蘭見代興

施愚山先生嘗文
謙於此野溪近以

級蘭各
其署齋

曲磴紆迴別一天千章古木罨晴煙青青不斷王孫草
葉葉頻過賈客船時有鳴鈴聞殿角更無塵轍到亭前
懶殘分芋吾何敢珍重先參玉版禪

饌中有
山笋

遊慧力寺次壁間韻

李昌昱

落到庭花春事閒會於幽利意相關伏龍僧去輪猶轉
瘞鶴碑存字已斑出郭煙巒知幾點穿林茅屋自三間
雨肥風折皆堪玩乘興還期訪閣山

辛卯次前韻

耽閒長自不曾閒幾度禪林來款關谷鳥啼時煙樹碧
巖花落處石苔斑春歸忽忽復前日宦老遲遲循此閒

但許浮名兼吏隱不須沈暝覓深山

甲午再次前韻

老懷春暮合偷閒風雨經旬長掩關空外新聞鐘鼓報
鏡中喜失鬢毛斑招邀恰有煙霞侶追逐猶堪履屐閒
半日浮生仍此約簪花洗竹當遊山

春日遊慧力寺步郡大夫李公韻 汪志仁

難得春晴官又閒滅除騶從到禪關尋花曲徑愁苔滑
問竹深林拭粉斑有客耽棋清晝裏何人調鶴翠微間
憑欄小立生遙思爲看東南雨後山

重遊慧力寺仍步郡守李公韻

此身輪與老僧閒却許花時更款關幾處林塘春又綠

三年觴咏髯初斑雲歸蟹舍漁莊外人在松風竹露閒
自是醉翁多樂意數聲啼鳥夕陽山

樟樹鎮爲王文成誓師處和德明府韻

楊賡謨

分封同姓漸驕橫黑子洪州敢弄兵抗節幾人酬主眷
臨危殲敵仗儒生先聲能作連營氣盡性無慚講學名
鹿渚重詢諸父老猶傳露布奏功成

初春再遊閭皂山

楊殿梓

披雲曾此事幽尋再款巖扉暮色侵寒竹風兼泉石響
春蘿月擺洞天深憑誰點簡神仙跡在處夷猶太古心
他日身閒山許買草廬應得傍疎林

九日遊慧力寺用李匯川先生韻 傅長澤

何處投閒不碍閒亂蟬聲裏萬松關簪花幸免重陽雨
摩碣同尋古蘚斑前輩風流看壁上半江清碧倚樓間
凭闌擬欲芟叢薄眺盡湖西萬疊山
邱樊朝帝總難閒乘興空林一款關塵世難尋蕉下夢
文章深愧管中斑題詩誰繼宣城後載酒應從賀監間
二百年來重此日登臨同醉遠公山

七言長律

宋

答清江錢太尹問山中景錢詩云傳聞仙境果何如
山勢言同宅一區寄語能

吟陳道判可憑
詩句說來無

陳孟陽

清江集卷二十一
形如閭阜對清江吳漢神仙古道場玉像靈多民受賜
天書歲久墨猶香絳霞密鎖靈仙館碧霧輕籠正一堂
蒼蘚爛斑雙鯉石寒泉澄九龍塘著衣臺上三冬暖
鳴水亭前六月涼搗藥鳥聲喧夜榻昇天馬跡印西岡
葛憩源深生異草凌雲峯峻染靈光丹井雖存人杳漠
松巢空見鶴飛翔屏粧水墨誇陶弼門斷塵埃憶孟昌
風來松檜笙簫地春入園林錦繡鄉箇中自少紅塵到
閒裏惟知白晝長景物敢吟成小錄願憑賢宰一稱揚
詩五言絕句

宋

送呂嘉問赴臨江守

王安石

黃雀有頭顱長行萬里餘想因君出守暫得免苞苴

薌林雜詠

曾幾

東臯

市聲俱不聞野色良可喜聽公北宅住還我東臯子

西崦

一重仍一掩少有外人知杖履歸來處斜陽隱半規

南埭

薰風追晚涼愛日引朝步瘦策與青鞵應知來往路

北垞

不謂蕞爾邦有此巋然宅江山自比隣風月相主客

松谿

不似居城市澱湖上有松日斜人影散百丈臥蒼龍
竹鷗

煙雨百餘竿茅茨數間屋中有在家僧蕭然如此足
梅坡

被雪一枝好令人雙眼明未須貪結子對汝不勝清
蘭畹

深林以薌名花木不知數一點無俗氛蘭芽在幽處
叢桂

行攀叢桂枝坐息叢桂影王孫胡不歸歲寒霜雪冷
海棠洞

玉頰酒潮紅醉頭扶不舉杜老豈無詩應爲六丁取

柔桑陌

南北綠成陰園林正春老能令蠶事辦更遣鴉首好

梨花原

酒渴上安市甘寒爲解圍鶯兒黃不見空見鷺鷥飛

柑子園

小摘亂青黃開嘗馥香氣持比千戶封真成敗人意

山齋

頗知藏曲折故作小崢嶸一穉香已過半山雲正橫

泛宅

薌林新賜宅春水向鷗前不是蕭何第元非范蠡船

碧蘆溼

春風桃李蹊學語鳥相喚不可無寒蘆汀洲下鳧雁

虎川

嘯壑有於兔吹波作奇字川上雪髯翁文章政相似

放魚磯

一絲公不挂釣餌也憐渠舊日垂竿地臨流只放魚

三老亭

華髮累朝人蒼髯幾時樹政恐郢斤尋明堂要材具

企疏堂

薊林未置身泛宅先入手二疏歸來時能似今日否

通幽花徑

一徑夾青葱無人到幽處花發曉鶯啼欣然得佳趣

羣翠庭

羣木上參天清陰并爲一炎曦無路來不廢風月入

墨莊五咏

朱子

墨莊

詩書啟山林德義久儲積嗣世知有人新畬更開闢

冽軒

牕開深井泉窈窕千丈碧何幸且淵澄無勞遽心惻

靜春堂

幽人本何心偶此得安堵隱几亦無言光風遍寰宇

玩易齋

竹几橫陳處韋編半掩時寥寥三古意此地有深期

君子亭

倚杖臨寒水披襟立晚風相逢數君子爲我說濂翁

過臨江 集杜

文天祥

自離南安軍五日而至廬陵七日過臨江八日至
豐城余雖不食未見其殆衆以飲食交相逼迫予
念既過鄉州已失初望委命荒濱立節不同且聞
暫止金陵出坎之會或者有隕自天未可知也遂
復飲食勉徇衆情初衆議以予漸殆欲行無禮掩
鼻以灌粥酪至是遂止乃知夷齊之心事由其獨
處荒山故得行其志耳

獨帆如飛鳴清江轉山急回首白雲多山寒夜中泣

元

梅谷井

楊士宏

茗飲貴山泉江流亦其亞甘寒如此井清絕梅花舍

敬庵

架上千卷書牕閒百衲琴鷄鳴風雨夜斂膝鬼神欽

明

偶出周伯宣至舍寫竹一枝而去歸見之因題

劉永之

虛館掩秋風叢篁長新綠知有幽人來蒼苔滿行躡

雨泊金鳳洲酬寄朝望太守

嚴嵩

厭聽高城雨還維古驛舟瓊枝那近眼煙浪遙生愁

鴉濕波翻木鷗喧雨滿洲離心何處是暝色載孤舟
鳳洲幾回至一至情眷眷佳期渺未忘薄別寧當怨
山閣憶春臨渚花宜晚望不共漢西遊空懷郢中唱
過蕭灘驛

孫偉

生涯此江水波浪敢輕越開岸天無風隨意釣舟發

書清江酒樓

周京

落日照江浦輕帆過酒家醉鄉真可託鷓首是天涯

迴龍寺

黃之俊

江濱數仞閣擁衲住高頭好着空空眼西來一派流

國朝

得雙鶴

臨江

施閏章

知有雲霄翮猶棲官樹陰中宵發清唳相對話歸心

櫻亭

在慧力寺

吳雲

櫻亭瑞筠上曉暮生煙霞寄語山中鹿歸來便有家

鶴冢

忽入深松處私看瘞鶴銘再求調鶴法補刻在茶經

太守喻公畫梅題見贈次韻奉酬

四首錄一

黎騫

遙遙夕難寐幽懷向誰發隱約見寒枝天闕生微月

清江月色

歐陽斗照

江水澂太虛寒蟾印秋影不待楓落時已似吳江冷

余規修郡學因考署解中宋時有吸川亭遂重構之

藉以籌計工力

施廷元

屢懷城闕憂物力籌興作况此宋時亭面江仰寥廓

郡城范節婦

熊時蘅

持此空閨月居然六十春妬雲知不到還照夜臺人

紫芝亭

釋智源

歐陽子既往施生先復來紫芝亭外月斜照讀書臺

六言絕句

宋

題清江慧力寺松風亭

康與之伯可

天涯芳草盡綠路傍柳絮爭飛啼鳥一聲春曉落花滿

地人歸

元

清江漁隱

杜本

山下白雲縹緲水邊緣樹依稀記是清江舊隱行人今

已思歸

清江道中

劉詵

細雨海棠成子餘寒江燕初歸立馬橋西沽酒行人未

試春衣

明

為黎崇瞻題竹

梁寅

曉逕蕭蕭爽籟暮林瑟瑟秋聲翠筠不受塵浣白晝驟

覺寒生

此詩據詩人玉屑所載係遊慧力寺詩也

七言絕句

唐

閣阜山

徐鉉

殿影高低雲掩映松陰繚繞步徘徊從今莫厭簪裾累
不是乘輅不得來

宋

蓮花寺

蘇軾

竹木交陰一徑通入門錦繡盡香風須知極樂無憂處
便是蓮花境界中

臨江驛中庭有大柏因寄穎叔

彭汝礪

林麓山頭屋數椽中庭翠柏上參天廟廊豈不須梁棟

位置荒幽亦偶然

和張慶符題余作清江圖

胡銓

痛飲從來別有腸酒酣落筆掃滄浪如今却怕風波惡
莫畫清江畫醉鄉

清江張氏活人堂

王庭珪

遠系長沙太守孫謂仲景家傳太守活人言刀圭一匕起

人死安得聲名不出門

過慧力寺松風亭

康與之伯可

江上濃陰曉未開瘦筇支我上蒼苔春寒昨日去已盡
今日又從何處來

欲遊閣阜山

劉過

此詩載詩人玉屑

仙梯難上塵緣重俗駕勒回山有靈煙靄模糊雨昏黑
數峯疑在夢中青

閣阜冲妙陳處和寄蒼玉軒圖 周必大

鷺溪未易起千尋龍籜何曾看滿林誰遣琅玕青我眼
道人披腹有高吟

臨江買舟 朱子

征驂聊駐近江樓南市津頭問買舟共說明朝乘雪水
長歌一日到洪州

樟樹鎮晚眺

朝晴遣我看薌林頃刻浮雲萬里陰拂袖臨風三十里
依然寒日照長吟

登閣阜山二首

疊疊層巒鎖闕宮我來特地訪靈蹤葛仙去後無丹竈
弟子今成白髮翁

一派泠泠泉下水半空漠漠嶺頭雲祖師成道衝天去
只有無窮愛籙人

答單應之問閣阜

回首名山我舊遊曾將風袂挹浮邱如今不及臺邊水
長向山前山後流

送單應之往閣阜

杖頭挑月入煙羅城郭塵埃奈爾何若到名山高著眼
洞天深處異人多

次韻擇之發臨江

千里煙波一葉舟三年已是兩經由今宵又過豐城縣
依舊長江直北流

竹節灘

船下清江竹節灘長煙漠漠水漫漫人家斷岸斜陽好
客子中流薄暮寒

玉虛觀去宜春二十五里許君上升時飛白茅數葉
以賜王長史王以宅爲觀觀傍至今有仙茅極異常
草備五味尤辛辣云久食可仙道士煮湯以款客

范成大

白雲堆裏白茅飛香味芳辛勝五芝採葉煮泉摩腹去

全勝石髓畏風吹

鄧志曰玉虛觀在清江思賢鄉太平市俗呼太平
觀清江未立縣以前地屬新喻實古吳平縣地也
吳平本屬豫章後并入新喻乃屬宜春郡今太平
去新喻縣八十餘里去宜春縣則二百六十餘里
石湖所云去宜春二十五里誤矣

臨江題楊秀才園三亭

王炎

繡春亭

幽園春風蕩漾時阿誰繡出百花枝春工不與人爭巧
玉筍羞拈五色絲

見山亭

江江集卷二十一
窗閒酒榭與詩編
窗外山光翠入簾
山好要人能領略
直須胸次似陶潛

移春亭

花邊春色可移來
遶屋株株手自栽
若要四時春不去
要添秋菊與寒梅

曾氏清江亭

徐鹿卿

想得當年月浸扁
諸公翰墨此縱橫
亭荒久矣詩亡恙
一道長江萬古清

隱仙寺

葛長庚

寂寂秋煙鎖碧灣
往年此處有禪關
清幽不異菩提境
好覓仙方九轉丹

元

題逃禪翁畫梅詞後二首

吳澄

小圃梅花能幾時
只餘豆粒綴青枝
禪翁壽得花如許
二百年來雪月姿

天與才情箇樣清
前身端是老梅精
妙詞難作人間唱
夢斷羅浮翠羽聲

清江道閉阻雨

何中

峯影微昏樹影明
人煙清淺水縱橫
前時逢雪今逢雨
長在江南畫裏行

賦德機詩後

虞集

玉堂妙筆交遊盡
投老江南隔死生
最憶崖州相憶處

華星孤月海波清

江望

郭鉅

盡把離愁種驛亭春風吹入草青青傷心爲問行舟客
東過清江停不停

和宋子與送圭峯僧

傅若金

飛錫翩翩去玉京也知富貴視來輕清江樹底天寧寺
詩罷長廊看月生

明

臨江劉仲修先生辭章翰墨誠爲雙絕近至南京大
夫士無不願見之求文卷軸森如束筍濂雖不敏而
慕豔之心爲尤切於其別去不能忘言謹賦二詩以

餞

宋濂

自從太乙夜然藜筆下虹光貫壁奎多少薦紳求識面
江南文價爲君低

相逢未久還相別恨不隨君結草堂大秀峯前雙鳳下
共聽法樂奏琳琅

觀清江傅氏西園題詠懷舊二絕 梁寅

憶昔西園曾見招春風歌響入春宵池上題詩花萼萼
林邊歸騎雨瀟瀟

一別桃源迷故津花隨流水幾回春煙塵豈料逢今日
翰墨猶期似昔人

寄章齊高

四首錄一

閭嶺雲開青映天蕭洲月上夜無煙太守愛居山水郡
名流尤羨幕官賢

爲徐東壁題金用中所畫清江隱居圖

文筆峯高出翠屏石龍潭冷桂松青郎官寫得林廬景
宛似東湖處士亭

赤城觀

解縉

曾到松湖訪赤城山人道士遠相迎一尊元酒十年醉
此日經過愧獨醒

徐仲敬作雪梅見貽因題其上

金幼孜

老氣崢嶸宇宙前開花萬朵照晴天平生自是調羹手
老大空餘雪滿顛

宿樟樹鎮靈峯寺

吳與弼

遙攜稚子訪名山多謝朋遊半往還幽意更便良夜宿
光風霽月滿禪關

得陳德雍書年九十餘矣猶有願學之志

陳獻章

越客初披手翰新天涯暮雨欲沾襟可憐一片長江水
日夜東流不待人

遇故人胡清敬臨江府送至新淦 張以林

翠竹蒼松映白沙居江西畔是君家明年歸路重相問
分食東陵五色瓜

登玉華峯夜宿山家

羅洪先

山下人家山客過旋鋪穰草枕藤蘿
墊心一片無人識
惟有閒雲入夢多

慧力寺

沈 槃

雲伴長松鶴伴苔
晚風輕袂寺門開
巖花野鳥春無限
消得臨江太守來

題慧力寺

強 滿

一徑青松半綠苔
夕陽樽酒爲君開
白雲飛過湖東去
散作松巖夜雨來

宿天寧寺

張 弼

堂北幽軒面古臺
松聲聒夢雨聲來
耳根塵土三千丈
縱有清風洗未開

鎮橋寺

李 槃

日上松牕僧起遲
水容山色雨淒淒
王孫莫厭春衣薄
閒倚寒松看碧溪

以玉帶付清江東林寺僧併紀以詩予昔讀書此寺

嚴 嵩

古寺東林記昔遊
芙蓉爲徑竹當樓
同時學侶還誰在
屈指如今五十秋

擔書徒步問程迷
夜叩林僧借榻棲
焚膏尙自驚殘夢
刻竹何因覓舊題

崇真觀

張 時

喬木陰陰路欲迷
數聲啼鴉野橋西
道人隱閉柴門臥

花落花開總不知

蕭灘驛

徐問

隔江花柳照沙明沙上勞勞客子行欲爲流年掩春色
不知春色更無情

玉女峯

孫治

玉女來看玉洞春玉人向引度雲根繇來大道無分別
不用含羞入洞門

天津送王道克還清江

敖英

萬里長安歷冰雪還鄉別我青春深五峯雙劍青未了
好去停橈湖上吟

澄心亭爲徐郎中賦二首

茶竈煙消鶴夢殘盆池風細藕花寒案頭一卷先天易
衙罷焚香獨自看

天迴北斗掛闌干燕坐清虛夜氣寒元武湖頭月初出
寶珠光動水晶盤

曾梅谷宅賞山茶花

錄一

誰遣此花爛縵開猩紅光映讀書臺主人有酒能招客
細雨斜風我亦來

寄題張用中御風亭

百年天地似飛蓬擺脫樊籠學御風見說空中有樓閣
幾番登眺到樓中

敖子發水亭次韻

邊貢

裊霧流雲水閣寒浴鳧飛鷺滿江干風潮莫向愁中聽
雪竹還畱醉裏看

章山

張叔鏜

章山山頂醉芙蓉牛斗光華倚太空匣裏無人能逼視
九霄風雨化青龍

半畝方塘月色勻遊鱗牽荇水成紋就中知有蛟龍氣
噓作磯頭片片雲

天寧寺藏經乃唐朝所頒賜者其副藏亦永樂年敕
賜一日俱燬殊爲悵然

雨餘閒步問緇衣廢鉢殘經掩敗扉不信禪天遂銷滅
松聲鳥梵尙依依

閻山雜咏

徐穎

樵蹊曲折入冰壺雪壁仙人字有無解道紅泉如可渡
此生期作掃花奴

赤烏碑仆事難憑碧瓦年深裂作冰自是神仙煙火外
不緣風雪斷香燈

冰天壓屋四無聞江樹連峯總化雲但得瓊漿換毛骨
直將人世葬書焚

羽衣謾謾勢如煙仙錄無人得秘傳今日雲孫化巫祝

當年菌閣變葑田

已上崇
眞官

流珠久秘杳難逢石室纍纍尙有蹤明月在天人在雪

三更私自禮東峯

右藏丹石室仙翁丹成藏之東
峯畱記云以埃廣修陰德者

側聞咳唾成珠易驚見梅花噴石難香處欲尋尋不得

一蓑風雪過橋寒

右梅花橋石上多梅花蹟云是仙翁噴水而成每當春霽閒聞香氣

玉篆中分斧劈痕人言雷火掣天門石蓮亦解風開落

十丈今無一瓣存

右巍石在駝峯之陽識云雷驚巍石香火歇嘉靖初果為雷火所擊

衣裾忽滅東峯頂雞犬難從半睡中弟子無聞丹竈冷

空畱瀑布響天風

右著衣臺

飛禽竊食語通靈峯頂猶存藥臼形凍手摩挲無所得

長生惟有石苔青

右搗藥臼

露盤直瀉上池水玉柱高搖碧落煙雁宕匡廬甲天下

無人來看第三泉

右瀑布泉自東峯右折逕鳴水亭亭畔引路松大十圍者凡五皆唐宋物

東峯

俞策

峯勢蒼茫北面開靈巖絕巘有高臺丹林一片平如掌

曾見仙人禮斗來

丁仙峯

秘室靈壇紫氣濃丁仙曾表赤泥封還家未化遼陽鶴

直是千年住此峯

搗藥臼

綠壁蒼巖紺石平披雲丹臼采金英靈禽啼過前峰月

猶作仙家搗藥聲

雙鯉石

化石雙魚遂不歸赤鱗曾是拂仙衣山風吹雨春雲溼

還似零陵燕起飛

梅花橋

世外丰姿與鶴同。閒將幽意寫長虹。自從冷落尋春屐，猶覺香侵碧澗東。

臨江八景

相傳臨江八景前輩有此詩者聊詠以志其概

秦鏞

城南古寺日深幽。伏馬橋頭記昔遊。只有數株松尚在。

根盤石路幾千秋。

右慧刹青松

鼇足誰云底柱堅。拍浮江上任蹁躚。細看石背渾無字。

恐有當年洪範篇。

右龜石春濤

中洲插竹又編籬。路似桃源境最奇。我欲卜居偕鳳隱。

楚狂休道德衰時。

右金鳳朝陽

沙上勞勞使客過。路傍楊柳折枝多。隔江呼起漁翁問。

盡日生涯一釣蓑。

右蕭江漁樂

江干寂歷水迴湍。雁落平洲影欲單。蘆葦蕭蕭無啄粒。

也應無意拾盤飧。

右蘆汀落雁

參差樹影望中連。暝色溪流併作煙。莫道河灣剛半月。

清光如許十分圓。

右蛟溪夜月古志云清江如太陰半月之形

何處千艘集井煙。屹然雄鎮想當年。只今細數歸帆少。

緡算應捐百萬錢。

右棹鎖歸帆

閣峯縹緲入雲端。積雪猶封禮斗壇。山遠地偏游不得。

幾回駐馬隔江看。

右閣峯晴雪

伯祥太史講學明宗書院書此寄之兼示諸子

錢應華

吾儒實用在明宗昔信姚江不再逢海內祇今需大畧
臯比擁坐語從容

江湖魏闕意如何老我年來白髮多舒嘯林臯無一事
春風聽汝樂絃歌

題清江真義廬

田蘇兆

指困無復周公瑾排難誰逢魯仲連今日清江聞勅使
義聲喜並古人傳

乙亥秋日過舒嘯亭時予忝清江四載矣因事感賦
二章呈堅白先生

王心純

碌碌塵淄媿菲才擬同彭澤賦歸來閒心得似先生好
舒嘯林臯日幾回

握手論心意若何秋風盡日捲紅波若從世路求交道
祇問黃金多不多

國朝

余家有地在慧力寺首曰木樨園銀杏三株今施寺
內永爲供佛地他日輯瑞筠山志幸以此詩附梓

黃尙賓

木樨園內雨花香歲歲秋風鴨脚黃圃樹總歸招提境
特記先人手澤長

柑林和石莊

施閏章

重陽辜負菊花筵此日流觴碧玉川山磬忽飛深樹裏
沙鷗還臥夕陽前

寄劉覺岸同年

覺岸官比部郎孤居不肉食京師謂之劉佛頭以
母老引疾終養來臨江鐵佛寺手繙藏經予日煩
吏事劉日子曾見青蓮花有離汙泥生石上者乎
聞之輒然別後寄二絕句

久辭簪笏愛江亭凍手時繙貝葉經莫是三生石畔客
欲回煙棹太丁寧

檻猿籠鶴枉咨嗟羨汝閒餐五嶽霞領取江樓深夜語
不聞石上種蓮花

臨江雜詩

錄六

閣山煙雨接虛無碧嶂清江翡翠鋪好置亭臺添畫舫

爲君喚取作西湖

更無羅綺豔江邊高種茶園低種田一歲繁華燈下盡
滿城歌管送神船

萬松郭外一時空新種桃花幾樹紅最是春來暗雙眼

江城日夜雨聲中

城南舊有松林直接
瑞筠山謂之萬松關

夜夜江頭月一灣疎鐘聲裏白雲閒詩僧雪印殘篇盡
隻字從何覓半閒

半閒有詩
名今盡逸

雪印天寧寺僧洪武初召賦京陵春
曉詩稱旨賜衣詩見郡志慧力寺僧

渚鷗沙鷺自雙雙耆舊風流說此邦劉孔諸賢俱逝水
至今芳杜繞清江

回龍寺前野艇橫伏馬橋頭江水清聞說百花春正好

祇餘芳草向春生

郡舊有百花洲今廢

題施侯墓

江縣人傳讓宅名至今畱塚在孤城君看無數王侯墓
蔓草荒涼楚老耕

峽山寺

曲徑疎林竹萬竿空山秋氣白雲寒殘僧猶說唐朝事
日暮徘徊倚杖看

石門

駱駝峯後近仙源破劍猶傳有石門多少游人畱姓字
只今惟有綠苔存

章山

笙鶴誰能見往還千家荒阜白雲間仙家祇在江城裏
尚有高人說買山

荷湖館

隔林煙火幾人家古廟江頭噪晚鴉欲問芰荷香寂寂
一川新漲白蘋花

題愚樓

周體觀

九月秋江照眼新酒徒詞客往來頻天涯何處無池館
但是愚樓作主人

愚樓

朱徽

鳳尾龍髯滿院陰樓高不怕歲寒侵風迴羣玉峩山響
擁褐先生正拊琴

樓名別號總同呼自是高情世味疎不比柳州多悵惘
盡將山水姓爲愚

樟樹鎮王文成公誓師處

王士正

豹房虎圈氣如雲行在從容露布聞誰識書生離講席
絕勝三十六將軍

樟樹鎮

查慎行

蕭灘流下棹歌聲一曲清江見底清老樹不知生意盡
尙憑古社占郵名

清江道中

柑林百里夾清江岸岸風來自雪香何減浣花溪上路
人家多在果園坊

范節婦

熊頤

織素鳴機曙未分寒風吹裂苧麻裙縣君莫去催租賦
孀婦無心刺繡紋

牛灣

桑調元

牛灣波色碧盈盈彷彿錢塘瀉淚聲我自頻年傷水逝
不堪斜月到三更

過慧力寺晤雪青和尚

沈植厚

一抹蒼然刷眼青西湖咫尺見南屏半閒更似孤山侶
來鳳亭疑放鶴亭

葯房夜坐

張天棟

紙幅畫成紅芍藥墨盃香浸紫薔薇西銘讀竟爐煙細

一線春寒透董幃

春暮過長生庵六絕

錄二首

楊錫紱

遊屐曾經廿載前辛夷花發鷓鴣天重來應有山僧識

一曲平沙響暮絃

上人曾爲余操平沙落雁

溪流來綠一灣黃花翠竹此中間老僧近愛看雲岫

另闢禪門對遠山

集句酬邑宰汪公

楊如源

朝宴華堂夜未休更逢詩客上高樓心知不及柴桑令

取盡珠璣碧海愁

會心亭

釋福慧

謾謾松風響翠岑鳥啼花笑碧雲深遊人只愛春光好

未必欣然一會心

晚春雨後寄天寧寺陳文學嘉言 釋祥安

好雨能清滿路塵山中畱得幾分春不知幽處拈花侶

可有新詩到野人

天寧寺方丈有匾曰幽處拈花

天寧寺坐雨

時讀書西寮

周培元

癡雲如墨壓重檐几案昏濛卷懶拈啄無聲僧入定

惟聞鎮日雨廉纖

屈指時光正社前遙知新水滿秧田何當咒起城根石

助灑春膏徧八埏

橫溪雜咏

呂字

一簣煙雨老橫溪釣艇魚竿舊有隄遊子歸來春正好

柔桑夾岸鷓鴣啼 橫溪

半畝方渠皎鏡開行吟獨夜足徘徊天心一片銀堆處
幾箇魚兒嚼月來 看月渠

花南水北半桑干女伴提籠笑語歡到得纈成分白雪
依然屋角綠雲團 桑園

稼穡無愁風雨愆年年圩戶競培填君看水作修蛇勢
走入三村萬頃田 老壩

一水平分溪四流依稀風景似三洲柳陰坐石垂綸者
不識人間萬戶侯 四漁口

夾道濃陰翠蓋連村鴉啼亂萬銖錢兒童那用高槐仰
落葉堪添晚爨煙 榆林

寒泉深處淨無瀾老樹婆娑覆井間日日家人提甕汲
扶疎影裏照雲鬟 桑井

堆成天馬結高門往事如今孰與論但使千年形勝在
煙霞猶自戀荒村 天馬堆

詩餘

宋

浪淘沙 別劉原父

宋 祁

少年不管流光如箭因循不覺韶華換到如今始惜月
滿花滿酒滿扁舟欲辭垂楊岸尚同歡宴日斜歌闕
將分散倚蘭橈望水遠天遠人遠

意難忘

宋 遠

同勝玉霄周秋陽劉尙友蕭高峯邂逅古洪題樟
鎮華光閣誌別分韻得重字

雞犬雲中笑種桃道士虛費春風山城看過雁春水夢
爲龍雲上下燕西東久別各相逢向夜深江聲浦樹燈
影漁蓬 舊遊新恨重重十分談笑一樣飄蓬元經摧
意氣丹鼎賺英雄年易老世無窮春事苦匆匆更與誰
題詩藥市沽酒新豐

水龍吟

前題得細字

周景

人生能幾相逢百年四海爲兄弟舊時青眼今番白髮
年華隕涕春更無情拋人先去楊花無蒂況江程漸短
別期漸緊須重把蘭舟繫 幸自清江如砥指黃蘗流
鶯聲細滄波如許平蕪何處明朝迢遞何預興亡不如
休去墻陰挑薺且相期共看蓬萊清淺更三千歲

憶舊遊

前題得論字

劉將孫

正落花時節憔悴東風綠滿愁痕悄客夢驚呼伴侶斷
鴻有約回泊歸雲江空共惆悵夜雨隔蓬聞儘世外縱
橫人間恩怨細酌重論 歎他鄉異縣渺舊雨新知歷
落情真匆匆那忍別料當君思我我亦思君人生自非
麋鹿無計久離羣此去重消魂黃昏細雨人閉門

八聲甘州

前題得文字

蕭列

可恰生飄零到荼蘼依然舊消魂殘春幾許風風雨雨
客裏又黃昏無奈一江煙霧腥浪捲河豚身世忽如葉

那自清渾 莫厭悲歌笑語奈天涯有夢白髮無根怕
相思別後無字寫回文更月明洲渚杜鵑聲裏裙袂難
分三生石情緣千里風月柴門

明

永遇樂

梁寅

丙午歲仲秋與胡中山同舟往南昌至樟鎮而返
別逾一月作此寄之中山能談太定數

年少羨君有如瓊樹相見何晚虎瞰山前輕船同載正
桂花香滿封溪一夕孤蓬聽浪又趁朔風遄返計行藏
只堪一笑怕令白鷗驚見 君如管輅聰明負異能道
山翁奇蹇絳闕蓬萊人間天上翹首仙凡遠何時訪我

竹谿松壑儘有白雲堪翫寫長懷且寄南飛秋雁

帝臺春

送徐太守

符錫

亭亭物表氣宇秋天杳廉明太守說向吾人古來稀少
清風兩袖朝天去轉眼是鳳池春曉好敷陳獸錦袍新
御爐香裊 蓬萊島鶯花繞霜月皎雞人早竚獻績天
顏渥恩重謾回首石城雲杪舟楫川途莫道煩乾坤整
頓還須了記取舊門墻幾人歸鑑藻





... 始則其門...

... 始則其門...

... 始則其門...

... 始則其門...

... 始則其門...

... 始則其門...

... 始則其門...